

新時代
史地叢書

中

國
國
民

黨
史

主編者

吳敬恆
蔡元培
王岫廬

撰述者 華林一
校閱者 蔡元培

舊



由國家圖書館數位化、
典藏

中國國民黨史目錄

第一章 緒論	一
第二章 興中會	九
一、革命之起原	九
二、孫中山先生	〇
三、興中會之創立	一
四、興中會時代之革命行動	一六
第三章 革命同盟會	一八
一、同盟會之成立	一八
二、同盟會軍政府之宣言	一九



三、同盟會時代之宣傳工作……………二二三

四、同盟會時代之革命行動……………二二四

第四章 民元組織之政黨國民黨……………二二八

一、辛亥革命之成功……………二二八

二、同盟會之公開與政黨之紛起……………三三〇

三、同盟會之改組爲國民黨……………三三二

四、國民黨之興盛……………三四

五、國民黨之分裂與衰落……………三五

第五章 中華革命黨……………四〇

一、革命精神之恢復……………四〇

二、袁世凱之稱帝……………四一

三、三次革命……………四二

00529
8672
17

四、共和之再造與政黨國民黨之復活·····	四六
第六章 護法非常國會時代之國民黨·····	四九
一、國會之解散與西南之護法·····	四九
二、南方國會之解剖·····	五〇
三、軍政府之改組及南北之議和·····	五二
四、政學會系與桂系之失敗·····	五四
五、北伐與陳炯明之叛變·····	五六
六、陳炯明之失敗與中山先生之回粵·····	六四
第七章 中國國民黨之改組·····	六六
一、俄國革命之影響·····	六六
二、十二年一月一日之中國國民黨宣言·····	六六
三、十三年一月之改組·····	七二



四、改組後中國國民黨之組織……………八三

五、改組後宣傳之注重……………八七

六、正式黨軍之養成……………八八

第八章 中山先生之北上與逝世……………九〇

一、曹錕之賄選……………九〇

二、曹錕與佩孚之覆滅……………九一

三、國民黨對於解決時局之主張……………九二

四、中山先生之北上與患病……………九五

五、中山先生之逝世……………九七

第九章 中山先生逝世後之國民黨……………一〇三

一、兩廣之統一……………一〇三

二、北伐之成功……………一〇六

三、國民政府之成立與第二次代表大會之召集	一〇八
四、黨內之糾紛	一一〇
第十章 排共運動	一一二
一、中國共產黨	一一二
二、中國國民黨之改組與共產黨員之加入	一一三
三、西山會議與排共運動之勃興	一一四
四、調解之失敗	一一七
五、吳稚暉舉發共產黨之謀叛	一二三
六、實行驅共	一三一



正誤

八十五頁國民黨組織系統表中之「中
央黨部」四字外，應加括弧，其下「特別
市黨部」五字旁，應加「海外黨部」四字。
八十六頁國民黨與國民政府之關係表
中之「中央黨部」四字衍。

中國國民黨史

第一章 緒論

今日中國國民黨之勢力，已遍及全國。前清末年，秘密結社，不僅中國國民黨之始祖與中會而已，民國成立以後，政黨更爲發達，大小政團，不下數十，然未幾即無形消滅，惟國民黨繼續發展，卒抵於今日之成功。此何故耶？蓋其他之政團，爲謀一時之私利而結合，本無救國救民之志。而國民黨則始終以救國救民爲目的，且具政黨組織必要之條件。此種必要之條件有三：一曰一定之主義，一曰嚴密之組織，一曰甘爲主義而奮鬥犧牲之黨員。

中國國民黨之主義爲三民主義。三民主義者，一曰民族主義，一曰民權主義，一曰民生

主義。民族主義之目的，在求中國民族之解放與獨立。辛亥以前，民族主義運動之作用，在脫離滿清之宰制。迨滿清之宰制政策摧毀以後，列強之帝國主義，依然從武力經濟兩方壓迫中國，足使中國民族失其獨立與自由。於是民族主義運動之作用，乃轉而求脫離帝國主義之侵略與壓迫。民權主義之目的，在於間接民權之外，復行直接民權。為國民者，不惟有選舉權，且兼有創制、複決、罷官諸權。而政府方面，則以五權分立為原則，所謂五權者，即立法、司法、行政、考試、監察是也。民生主義之最要原則有二：一曰平均地權，一曰節制資本。平均地權之要旨，為由國家規定土地法、土地使用法、土地徵收法及地價稅法。私人所有土地，由地主估價，呈報政府，國家就價征稅，並於必要時依所報價收買之。節制資本之要旨，為企業之有獨佔性或規模過大為私人之力所不能辦者，如銀行、鐵路、航海之屬，由國家經營管理之，使私有資本制度不能操縱國民之生計。此三民主義最合於世界之新潮流及中國之需要；中國之惟一生路，即在此主義之實行。

國民黨之組織，初甚簡單，逐漸改進，至民國十三年改組以後，始甚嚴密。最高有中央黨

部，中央黨部下，有省黨部、特別地方黨部及特別市黨部，省黨部、特別地方黨部下，有縣黨部、與市黨部，其下則為區黨部，區黨部之下則為區分部。各級黨部，皆有執行委員會，其中更設常務委員會及秘書處，又各有組織部、宣傳部、及農人部、工人部、商人部、婦女部、軍人部、青年部等分部組織，以管理並指導黨員及各階級之民衆。其組織系統，可謂十分嚴密矣。

國民黨黨員之甘為主義而奮鬥犧牲，自清末以至今日，蓋莫不然也。手創國民黨之孫中山先生，努力革命，四十年如一日，固無論矣。而其他之黨員，於清末時持手槍炸彈至各處與清政府奮鬥，謀殺清政府最兇惡之官吏或督撫，以冒死起義。民國成立以後，更與惡勢力奮鬥，前仆後繼，再接再厲。國人之所以多同情於國民黨者，良以此也。近年黨勢擴張，黨員益衆，正式黨軍亦已養成，乃有規模更大之奮鬥，以謀三民主義之實現。

觀上所述，可知國民黨確為一極完備之革命政黨。然其所以能至若是之完備者，非一朝一夕之功，乃數十年努力之結果也。故吾人苟欲澈底了解國民黨今日之情狀，非研究國民黨過去之歷史不可。研究國民黨史之方法，一面須依時代先後敘述黨之種種經過事實，

一面更須將各時期之思想、組織、行動等互相比較，以明其進化之迹。國民黨自最初創立以迄今日，其經過之事實，約可分為七期：（一）興中會時期；（二）同盟會時期；（三）民元組織之政黨國民黨時期；（四）中華革命黨時期；（五）護法非常國會時期；（六）十三年改組之中國國民黨時期；（七）排共時期。今於未分章詳敘之前，請先略述國民黨過去歷史之大概。

滿清末年，政治腐敗，內憂外患，相繼而作，有志之士，咸知非傾覆清廷，創建民國，不足以挽回頹勢。時孫中山先生行醫於澳門、香港，秘密進行革命運動，知無組織，無團體，不能有所作為，乃於甲午中日戰時，赴檀香山集合同志，創立興中會。旋偕同志歸國，謀舉事於廣州，以運械不慎而敗。中山先生乃走日本，復由檀島赴美，由美至英，被吾國駐英使館誘拘，旋得釋，即客居英倫，考察歐洲之情形，以完全其三民主義。二年後回國，謀在各處起事，皆無成。

清光緒三十年，中山先生重至歐洲，歐洲留學生已多數贊成革命，開會三次，加盟者數十人。旋由美至日本，連合興中會與湖南派之興華會、蘇浙派之光復會，組織空前之革命同盟會，加盟者數百人，以中山先生為首領。同盟會之主旨在驅除韃虜，恢復中華，建立民國，平

均地權，故於民族主義之外，更顧及民權主義與民生主義，三民主義可謂大體已具備矣。同盟會爲真正之革命黨，會員奮不顧身，謀在各地起事，如萍體之役，潮惠欽廉之役，鎮南關河口之役，安慶之役，黃花崗之役，汪精衛之刺攝政王，溫才生之刺廣東將軍孚琦，林冠慈、陳敬岳之彈炸李準，皆轟轟烈烈之革命行動也。

辛亥武昌起義，各省響應，革命成功，清帝退位，民國創立，革命同盟會乃改爲公開之政黨。時政黨林立，競爭甚烈，同盟會會員宋教仁乃謀與同盟會主義相接近之統一共和黨、國民共進會、共和實進會及國民公黨連合，組織國民黨，以擴張勢力。旋國民黨組織成功，勢力極雄厚。第一屆正式國會議員選舉結果，國民黨在衆議院佔二百六十九席，在參議院佔三百九十二席，竟佔絕對多數。然國民黨爲政府之反對黨，國民黨之得勝利，甚觸袁世凱之忌。袁氏乃一面用金錢收買國民黨籍之議員，祕密派人暗殺國民黨領袖宋教仁，一面組織大興黨，以厚政府之勢力。整個的國民黨，乃分成相友會、政友會、癸丑同志會、集益社、超然社等小政團。袁氏更逼吳景濂削除國民黨要人之黨籍，以串通亂黨爲名，逮捕國民黨議員，最後

并以武力解散國民黨，取消國民黨籍之國會議員，追激議員之證書徽章，下令停止兩院職務，國民黨遂等於消滅矣。

中山先生知袁氏之將帝制自爲，乃於民國三年重組中華革命黨於日本，恢復以前之革命精神，再與惡勢力奮鬥。旋袁氏果稱帝，雲南唐繼堯、蔡鍔組織護國軍，通電聲討，各省革命黨人紛起響應，袁氏知不能成，乃取消帝制，並羞憤而死。袁氏死後，國會復活，然未幾而張勳又逼黎元洪解散國會。迨張勳失敗，段祺瑞重行組閣，不將國會恢復。西南各省遂宣佈護法。

護法時代，以南方內多變故，故國民黨勢力未能有若何之發展。初有政學會系與桂系之專權，藉護法爲名，以行保全地盤之計。其後陳炯明所部粵軍，由閩攻粵，消滅桂系政學會系之勢力。中山先生回粵就大總統職，於收復廣西後，積極出師北伐，以期貫徹護法之初志，不意又有陳炯明之叛變。陳氏覆滅以後，中山先生復任大元帥之職。於治理軍政事務之暇，竭力從事於黨之整頓，於是乃有十三年一月之改組。

民國十三年一月，中山先生召集全國及海外國民黨同志代表，在廣州開第一次全國代表大會，決定黨中總章，規定施行之政綱，容許中國共產黨黨員加入國民黨。由是散漫之國民黨，遂成極有系統與嚴密組織之革命政黨矣。

同年九月，直派之江蘇督軍齊燮元與反直派之浙江督軍盧永祥正式開戰。反直派之奉天張作霖，亦為軍事之準備，分兵三路入關，與直軍激戰於山海關。旋直軍第三軍總司令馮玉祥班師回京，迫曹下野，並與奉軍聯合進攻吳佩孚，吳佩孚遂亦覆滅。中山先生欲謀和平統一，乃離粵北上，主張召集國民會議。孰意甫抵天津，即患重病，入京徧延名醫診治，俱未見效，竟於十四年三月十二日逝世。

中山先生逝世以後，國民黨同志繼先生之志，繼續奮鬥，未嘗稍懈。先將廣東省內陳炯明之殘部肅清，繼又討平楊希閔劉震寰之叛變，統一兩廣。十五年七月，復以蔣介石為總司令，統率國民革命軍大舉北伐，先後克復湖南、湖北、江西、福建、浙江、江蘇、安徽等省，長江流域，已盡入國民黨勢力範圍以內。惜黨內發生重大紛擾，共產黨有不利於國民黨與國民革命

之謀，致國民黨勢力之進展，不能如預期之速。然自清黨以來，黨內之反革命份子，已漸告肅清。此後全體黨員，團結一致，悉奉三民主義而努力奮鬥，必能於短時期內統一全國，完成國民革命。

以上所言，乃國民黨過去歷史之大概也。至其各時期之詳情，則當於以下九章依次敘述。



第二章 興中會

一、革命之起原

自滿清以異族入主中國，漢人多抱亡國之痛，一般忠臣烈士，時圖恢復，雖終無成，而以後革命之種子，則於此已下矣。至清中葉，明末志士，死亡殆盡，然遺風不絕，乃有洪門會黨之組織，抱民族主義，以反清復明爲宗旨。其中有三合會哥老會等派別，散處於國內外，潛勢力甚大。惟以無機可乘，又無有才能之領袖統率，故除辛亥以前之數次革命得其助力外，無若何之動作。

滿清末年，政治日益腐敗，而種族之見亦日深，歧視漢人亦日甚。其時世界各國，自工業革命發生以後，盛倡民族主義與帝國主義，崇尚武力，日事侵略，競將世界上經濟落後之國家，收爲己國之殖民地或半殖民地。中國自海禁開後，外侮頻至，鴉片之戰、中法之戰、中日之

戰，先後失敗，其間雖有洪秀全之革命軍，而終爲滿奴所敗，無救於國勢之衰弱。有志之士，觀此情形，知非有重大之改革，必不能挽回頹勢，救吾中國。

此時之改革運動，凡分二派，一爲康有爲梁啓超派，一爲孫中山先生派。康梁欲學日本之維新，主張君主立憲。康有爲草一書，論改革救亡，徧傳各會館署名，上之光緒，卽所謂公車上書者是也。後果被大用。然未幾而戊戌政變以起，康梁逃亡日本，利用光緒之名號，創立保皇黨。此後毫無建樹，其改革運動，可謂完全失敗。惟孫中山先生所領導之革命運動，則日日發展，以抵於今日之成功。

二、孫中山先生

孫中山先生名文，字逸仙，以逃亡日本後改名中山樵，故人遂通稱之爲中山先生。先生以清同治五年（民國紀元前四十六年）十月初六日（卽陽曆十一月十二日）生於廣東香山縣之翠亨，距太平天國之亡僅三年。幼曾從美教士習英語。十三歲，入其叔所設之私塾，聞洪楊故事喜之，卽以洪秀全第二自許。旋赴夏威夷入耶教學校。十六歲回國，入廣州之

博濟醫學校，得識鄭士良，與談革命，士良悅服。十七歲，轉學於香港阿賴斯醫院，又識陳少白、尤少執、楊鶴麟、陸皓東諸人，與陸、尤、楊斯夜談革命，時人呼爲四大寇。鄭士良爲三合會中首領，深知秘密結社之內情。二十歲，先生畢業於香港醫校，謀傾覆清廷，創建民國，以學校爲鼓吹之地，借醫術爲入世之謀，乃懸壺於澳門、香港，從事於革命運動。復與陸皓東北遊津京，以窺清廷之虛實，深入武漢，以觀長江之形勢。其深謀遠慮，於此可見矣。

三、興中會之創立

中山先生知無組織無團體，必不能有所作爲。甲午，中日開始宣戰，先生以爲時機可乘，乃赴檀香山，集合同志，創立興中會，乃國民黨之最前身也。其宣言曰：「中國積弱，至今極矣！上則因循苟且，粉飾虛張；下則蒙昧無知，鮮能遠慮。堂堂華國，不齒於列強，濟濟衣冠，被輕於異族。有志之士，能不痛心？夫以四百兆人民之衆，數百萬土地之饒，本可發憤爲雄，無敵於天下。乃以政治不修，綱維敗壞；朝廷則鬻爵賣官，公然賄賂；官府則剝民括地，暴過虎狼。盜賊橫行，饑饉交集，哀鴻遍野，民不聊生。嗚呼慘矣！方今列強環列，虎視鷹瞵，久垂涎吾中華五金之

富，物產之多。蠶食鯨吞，已見效於接踵；瓜分豆剖，實堪慮於目前。嗚呼危哉！有心人不禁大聲疾呼，拯斯民於水火，扶大廈之將傾。庶我子子孫孫，或免奴隸他族。用特集志士以興中，協賢豪而共濟。切仰諸同志盡自勉旃。」

宣言以外，又有章程，其章程如下：

一、會名宜正也。本會名曰興中會，總會設在中國，分會設各地。

二、本旨宜明也。本會之設，專為聯絡中外有志華人，講求富強之學，以振興中華，維持團體起見。蓋中國今日政治日非，綱維日壞，強鄰輕侮百姓，其原因皆由衆心不一，祇圖目前之私，不顧長久大局。不思中國一旦為人分裂，則子子孫孫世為奴隸，身家性命且不保。急莫急於此。私莫私於此，而舉國憤憤，無人悟之，無人挽之，此禍豈可幸免？倘不及早維持，乘時發憤，則數千年聲名文物之邦，累世代冠裳禮義之族，從以淪亡，由茲泯滅，是誰之咎？識時賢者，能無責乎？故特聯結四方賢才志士，切實講求富國強兵之學，化民成俗之經。力為推廣，曉諭愚蒙，使舉國之人，皆能通曉。聯智愚為一心，合遐邇為一德，羣策羣力，投大遺

艱，則中國雖危，庶可挽救。所謂民爲邦本，本固邦寧也。

三、志向宜定也。本會擬辦之事，務須利國益民者，方能行之。如設報館以開風氣，立學校以育人才，興大利以厚民生，除積弊以培國脈等，皆唯力是視，逐漸舉行，以期上匡國家，以臻隆治；下維黎庶，以絕苛殘。必使吾中國四百兆生民，各得其所，方爲滿志。倘有藉端舞弊，結黨行私，或畛域互分，彼此歧視，皆非本會志向，宜痛絕之，以昭大公，而杜流弊。

四、人員宜得也。本會按年公舉辦理人員一次，務擇品學兼優，才能通達者。推一人爲總辦，一人爲幫辦，一人爲管庫，一人爲華文之案，一人爲洋文之案，十人爲董事，以司會中事務。凡舉辦一事，必齊集會員五人，董事十人，公議妥善，然後施行。

五、交友宜擇也。本會接收會友，務由舊會友二人薦引，經董事察其心地光明，確具忠義，有心愛戴中國，肯爲其父母邦竭力，維持中國，以臻強盛之地，然後由董事帶之入會。必要當衆自承其甘願入會，一心一德，矢信矢忠，共挽中國危局，樂填名冊，並即繳會底銀五元，由總會發給憑照收執，以昭信守，是爲會友。若各處支會，則由該處會員暫發收條，俟將

會底銀繳報總會，取到憑照，然後交換。

六、支會宜廣也。四方有志之士，皆可仿照章程，隨處自行立會，惟不能在一處地方分立兩會。無論會友多至幾何，皆須合而爲一。又凡每處新立一會，至少須有會友十五人，方算成會。其成會之初，所有繳底領照各事，必須託附近老會代爲轉達總會，待總會給照認妥，然後該支會方能與總會互通消息。

七、人才宜集也。本會需材孔亟，會友散處四方，自當隨時隨地，物色賢才。無論中外人士，倘有心益世，肯爲中國盡力，皆得收於會中。待將來用人，各會可修書薦至總會，以資臂助。故今日謹爲搜集，乃各會之職司也。

八、款項宜籌也。本會所理各事，事體重大，需款浩繁，故特設銀會，以集鉅資，用濟公家之急，兼爲股友生財捷徑，一舉兩得，誠善舉也。各會友好義急公，自能惟力是視，集腋成裘，以助一臂。茲將辦法節略於後。每股科銀十元，認一股至萬股，皆隨所便。所科股銀，由各處總辦管庫代收，發給收據，將銀暫存銀行。待總會收股時，卽彙寄至總會收入，給發銀會股

票由各處換交各友收存。開會之日，每股可收回本利百元，此於公私皆有裨益。各友咸具愛國之誠，當踴躍從事，比之捐頂子，買翎枝，有去無還，洵隔天壤。且十可圖百，萬可圖億，利莫大焉，機不可失也。

九、公所宜設也。各處支會當設一公所，爲會員辦公之處，及使各友時到敍談，講求興中良法，討論當今時事，考究各國政治，各抒己見，互勉進益。不得在此博奕遊戲暨行一切無益之事。其經費由會友按數捐支。

十、變通宜善也。以上各款，爲本會開辦之大綱，各處支會自當仿照辦理。至於詳細節目，各有所宜，各處支會可隨時變通，別立規條，務盡妥善。

觀與中會之宣言與章程，可知與中會之宗旨，唯在聯絡中外有志華人，講求富強之學，以振興中華，維持團體。此之所謂振興中華者，當指推翻滿清創立新國家而言，故民族主義之色彩最爲濃厚，民權民生皆未提及。會之組織，雖已粗具，然甚簡單，以覺悟之華僑及會黨爲革命之基本勢力。而華僑又應者寥寥，僅得鄧蔭南及其胞兄德彰，願傾家相助。

四、興中會時代之革命行動

甲午中日之戰，清兵大敗，人心憤激，中山先生乃乘此時偕同志鄧蔭南等數人歸國，開乾亨利於香港，設農學會於廣州，先生往來籌劃，謀三路進兵，一舉而奪廣州，以爲以後革命之根據地。乃以運械不慎，被海關搜獲手槍六百餘桿，事機遂洩。陸皓東、丘四、朱貴全等皆死之。被捕七十餘人，廣東水師統帶程奎元亦與焉，後死於獄中。事後十餘日，中山先生與鄭士良、陳少白等始問道同至日本橫濱。

中山先生旋又去檀島，推廣興中會，以風氣未開，進行甚滯，乃赴美洲，亦無若何發展。然已大觸清廷之忌。清光緒二十二年八月，先生由美至英，被吾國駐英使館誘拘，欲私送回國，幸得香港醫校教師英人康德黎之救，始獲釋放。而中國革命黨領袖孫逸仙之名，由是而爲全世界人士所共知矣。脫險後，卽客居英倫，完成三民主義。然恐曠廢革命時日，乃至日本，命陳少白回香港，創辦中國報，以鼓吹革命；命史堅如入長江，聯絡會黨；命鄭士良在香港設立機關，招待會黨，於是長江、閩、粵之會黨，皆併合於興中會矣。

旋北方義和團之事發生，先生擬入粵活動，至香港，不得登岸，謀從台灣趨惠州，亦不可得。時鄭士良率領惠州大鵬山附近山寨之衆，相機起事，連戰皆捷，以軍械接濟斷絕而敗。同時史堅如謀炸兩廣總督德壽之署，炸發不中，被擒殺。此外黃興長沙之役，亦未獲成。



第三章 革命同盟會

一、同盟會之成立

清光緒三十年，中山先生重至歐洲。時歐洲留學生以新從內地或日本而來者，多已受革命思潮之陶冶，故已多數贊成革命。其自傳曰：「予於是乃揭櫫吾生平所懷抱之三民主義五權憲法以號召之，而組織革命團體焉。於是開第一會於北京，加盟者三十餘人，開第二會於柏林，加盟者二十餘人，開第三會於巴黎，加盟者亦十餘人。」此三次所召集之會，仍名與中會。

是年夏，中山先生自美至日本，其時黃興、宋教仁等亦亡命於日本，歡迎先生於東京之富士樓，乃合廣東派之興中會，黃興、宋教仁等湖南派之興華會，章炳麟等蘇浙派之光復會，組成空前之革命同盟會，加盟者數百人，中國十八省除甘肅省外，皆有人入盟。先生嘗曰：

「集合全國之英俊而成立革命同盟會於東京之日，吾始信革命大業，可及身而成矣。」同盟會以中山先生爲首領，黃興爲副首領。中華民國之名稱，卽於是時規定也。由是革命之潮流日見興盛，不一年而加盟者已逾萬人，支部先後成立於各省。

三、同盟會軍政府之宣言

同盟會組成以後，發佈以下之宣言：

「天運歲次年月日中華國民軍政府命，以軍政府之宗旨及條理，佈告國民：今年國民軍起立軍政府，滌二百六十年之贖腥，復四千年之祖國，謀四萬萬人之福祉，此不獨軍政府責無旁貸，凡我國民，皆當引爲己責者也。維我中國開國以來，以中國人治中國，雖間有異族篡據，我祖我宗常能驅除光復，以貽後人。今漢人倡率義師，殄除胡虜，此爲上繼先人遺烈，大義所在，凡我漢人，當無不曉然。惟前代革命，如有明及太平天國，祇以驅除光復自任，此外無所轉移。我等今日與前代殊，於驅除韃虜，恢復中華之外，國體民生，尙當變更。雖經緯萬端，要其一貫之精神，則爲自由平等博愛；故前代爲英雄革命，今日爲國民革命。所謂國民革命者，一

國之人皆有平等自由博愛之精神，即皆負革命之責任，軍政府特爲其機關而已。自今以往，國民之責任，即軍政府之責任，軍政府之功，即國民之功。軍政府與國民同心戮力，以盡責任。用特披露腹心，以今日革命之經綸，暨將來治國之大本，佈告天下：

一、驅除韃虜。今之滿洲，本塞外東胡。昔在明朝，屢爲邊患。後中國多事，長驅入關，滅我中國，迫我漢人爲其奴隸，有不從者，殺戮億萬。我漢人爲亡國之民者二百六十年於斯。滿洲政府窮凶極惡，今已貫盈。義師所指，覆彼政府，還我主權。其滿洲漢軍人等，如悔悟來降者，免其罪；敢有抵抗，殺無赦。漢人有爲滿奴作漢奸者，亦如之。

二、恢復中華。中國者，中國人之中國，中國之政治，中國人任之。驅除韃虜之後，光復我民族的國家。敢有爲石敬瑭吳三桂之所爲者，天下共擊之。

三、建立民國。今者由平等革命，以建立民國政府。凡爲國民皆平等，皆有參政權。大總統由國民共舉。議會以國民公舉之議員構成之。制定中華民國憲法，人人共守。敢有帝制自爲者，天下共擊之。

四、平均地權。文明之福祉，國民平等以享之。當改良社會經濟組織，核定天下地價。其現有之地價，仍屬原主，所有其革命後社會改良進步之增價，則歸於國家，爲國民所共享。肇造社會的國家，俾家給人足。四海之內，無一夫不獲其所。敢有壟斷以制國民之生命者，與衆共棄之。

右四綱，其處分之序，則分三期：第一期爲軍法之治。義師既起，各地反正，土地人民，新脫滿洲之羈絆，臨敵者宜同仇敵愾，內輯族人，外禦寇仇，軍隊與人民，同受治於軍法之下。軍隊爲人民戮力破敵，人民供軍隊之需要，及不妨其安寧。既破敵者及未破敵之地方行政，軍政府總攝之，以次掃除積弊致治之害。如政府之壓制，官吏之貪婪，差役之勒索，刑罰之殘酷，抽捐之橫暴，辮髮之屈辱，與滿洲勢力同時斬絕。風俗之害，如奴婢之蓄養，纏足之殘忍，鴉片之流毒，風水之阻害，亦一切禁止。每一縣以三年爲限。其未及三年已有成效者，皆解軍法，布約法。第二期爲約法時期。每一縣既解軍法之後，軍政府以地方自治權歸之。其地之人民。地方議會議員及地方行政官，皆由人民選舉。凡軍政府對於人民之權利義務及人民對於政府

之權利義務，悉規定於約法，軍政府及地方議會及人民皆循守之。有違法者，負其責任。以天
下定後六年爲限，始解約法布憲法。第三期爲憲法之治。全國行約法六年後，制定憲法。軍政
府解兵權行政權，國民公舉大總統，及公舉議員以組織國會。一國之政治，依憲法中行之。此
三期，第一期爲軍政府督率國民掃除舊污之時代，第二期爲軍政府歸地方自治權於人民
而自總攬國事之時代，第三期爲軍政府解除權柄，憲法上國家機關分掌國事之時代。俾我
國民循序以進，養成自由平等之資格。中華民國之根本，胥於是乎在焉。

以上爲綱有四，爲序有三。軍政府爲國戮力，矢信矢忠，終始不渝。尤深信我國民必須策
厲堅忍，共成大業。漢族神靈，久焜耀於四海。比遭邦家多難，困苦百折，今際光復時代，祈人人
各發揚其精神。我漢人同爲軒轅之子孫，國人相視皆伯叔兄弟諸姑姊妹，一切平等，無有貴
賤之差，貧富之別。休戚與共，患難相救，同心同德，以衛國保種自任。戰士不管其命，閭閻不惜
其力，卽革命可成，令政可立，願我四萬萬人共勉之。」

觀此宣言，可知同盟會時代之思想，已與興中會時代之思想大異。興中會時代，民族思

想最爲昌盛，至同盟會時代，則更顧及民權主義與民生主義，三民主義已大體俱備矣。此乃中山先生西游之結果也。其自傳曰：「倫敦脫險後，則暫留歐洲，以實行考察其政治風俗，並結交其朝野賢豪。兩年之中，所見所聞，殊多心得。始知徒知國家富強，民權發達，如歐洲列強者，猶未登斯民於極樂之鄉也。是以歐洲志士，猶有社會革命之運動也。予欲爲一勞永逸之計，乃採取民生主義，以與民族民權問題同時解決，此三民主義之主張所由完成也。」試將同盟會之宣言分析之，則驟除韃虜，恢復中華，卽民族主義之表現也；建立國民皆平等皆有參政權之民國，卽民權主義之表現也；平均地權，則民生主義之表現也。故是時三民主義已大致粗具，惟無以後之完備耳。

三、同盟會時代之宣傳工作

同盟會時代之宣傳工作有二：一爲文字宣傳，一爲行動宣傳。是時以前，祇有口頭宣傳與行動宣傳，文字宣傳猶少，至是而文字宣傳始大盛。同盟會以東京所發行之民報爲機關報，鼓吹革命，汪精衛胡漢民乃民報最有名之主筆也。民報與保皇黨之新民叢報辯論甚烈。

保皇黨爲虎作倀，其反對革命，反對共和，比之清廷爲尤甚，爲革命運動之重大障礙；然此派志在報効私恩，不合世界之新潮流，不合國人之心理，故一攻即破，永無能再起。當時革命文學中有三大名著：一爲章炳燭之檄書，一爲鄒容之革命軍，一爲汪精衛之民族的革命，而民族的革命一文，影響尤爲重大。經民報之鼓吹宣傳，革命空氣更滿播於中國，革命刊物益見增多，故辛亥武昌起義，轉瞬即風靡全國，將清廷推倒。

四、同盟會時代之革命行動

同盟會爲真正之革命黨，除以文字宣傳外，復積極行動。清光緒三十二年，黃興等回湖南，結合哥老會，編爲革命軍，謀三路進兵。事洩，被湘鄂軍會合擊敗。

次年，中山先生與汪精衛胡漢民等同行至安南，設機關於河內，聯絡潮州饒平黃岡會黨，與福建詔安縣會黨結合，謀劫黃岡協署軍械以起事，曾佔協署，克寨城，後爲潮州鎮兵擊敗，乘城而遁。同時鄧子瑜聯絡惠州會黨，在距城二十里之七女湖起事，博羅縣會黨應之，均先後爲營團所擊敗。

是年七月，廉州三那地方有萬人會之抗捐，欽州又有張得清之起事，清廷派郭人漳、趙伯先二人各帶新兵三四千人往平之。中山先生派人游說郭、趙，郭、趙皆贊成革命，允為內應。乃遣人往日本購械。適東京同盟會黨忽起風潮，而軍器輸運之計劃破壞，郭、趙又失約，全軍遂敗退十萬大山。十月，中山先生與黃興、胡漢民並法國軍官及安南同志百數十人，改由安南進攻廣西，襲取鎮南關，戰三日，佔領鎮南、鎮東、鎮北三砲臺，後以軍火不繼，乃棄關退入安南之河內。

中山先生又令黃明堂窺取河口，明堂率同志百餘人，聯絡清兵為內應，攻佔河口，并得南溪等處，清兵投降者達五千人。時先生遠在南洋，不能再過法境，乃電令黃興前往指揮。不幸黃興行至中途，被法官疑為日本人，截留之而送之回河內。河口之軍指揮無人，清兵四集，遂不守，黃明堂率衆六百餘人退入安南。

其時安徽安慶亦有徐錫麟之起義。徐氏在安慶辦巡警學校，擬乘該校學生畢業之期，邀皖省官吏前往參觀，聚而殲之，並聯合軍警以起事。當閱操時，徐氏以手槍擊皖撫恩銘，衆

大驚，遂四散。徐氏率學生據軍械局，防營兵圍之，徐氏遂被擒殺。後馬礮營隊官熊成基復繼徐錫麟而起義於安慶，亦未成。

清宣統二年，中山先生在庇能，決定籌款大舉於廣州，并預定攻下廣州之後，分全軍爲三部，一部出湘南，向湖北進攻，一部出江西，進攻南京，一部留粵爲後援，俟南京武昌克復後，卽會師北上。當時粵省武備廢弛，不難獲勝，不意內情爲奸細密告粵督張鳴岐，乃加意防範。革命軍發難時期，初定三月十五日，後改二十八日，又改二十九日。而鳴岐李準自得密報後，於二十六日飛調防勇二營回省，以三哨保守龍王廟高地，令旗兵運炮上城，并加發槍彈與警察。二十八日，鳴岐加派軍警防守軍械局，並分頭搜查黨人，破獲機關數處，拿獲黨人十餘人。事益急，黃興乃不俟約期，率百餘人進攻督署，借謝梅卿等由小東營出，槍殺橫阻之警兵，猛攻督署之衛隊，衛兵逃潰，有一二人棄槍求降，願爲引導，於是黃興與林時爽、朱執信、李文甫、謝梅卿、嚴驥等入署逼搜，張鳴岐已遁逃，無一要人。既出督署，清軍援師已至，林時爽在東轅門招撫李準之先鋒隊，突遇流彈陣亡，黃興傷右手，乃分三路突圍而出。其餘往攻龍王廟。

歸德門、軍械局等分隊，雖猛烈攻擊清軍，卒以衆寡不敵而敗退。此役殉難死者，粵籍有羅則軍等九人，川籍有饒國樑等二人，閩籍有林覺民等二十四人，徐維揚所部花縣健兒死二十四人，被擒在獄者六人。黃興在雙門底遇清軍時，人各爲戰，且戰且退，祇遺一人，黃興帶傷出大南門，二日始逃往香港。朱執信、熊克武、王以通、嚴驥等亦皆負傷。事後廣州知事潘達微偵知各烈士遺骸，已更續移置諮議局前墳地，乃往見廣仁善堂徐善董，謂諸烈士爲國捐軀，宜擇地掩埋。徐善董允將該堂沙河馬路旁地名黃花崗者讓出，并任棺殮諸事。潘達微乃親自督率土工棺殮，送至黃花崗埋葬。

此外又有汪精衛之刺攝政王，溫才生之刺廣東將軍孚琦，林寇慈、陳敬岳之彈炸李準，亦轟轟烈烈之革命行動也。

第四章 民元組織之政黨國民黨

一、辛亥革命之成功

革命黨人謀在各地舉事，雖皆失敗，然革命之氣焰，則由是而日高矣。

自廣東一敗再敗，革命黨人乃轉而謀諸武漢，運動湖北新軍，早已成熟。鄂督瑞澂，聞革命黨有將在武漢起事之流言，加意防範。陸軍第八鎮統制張彪，分布軍隊，按段梭巡。更調集特別巡警，右路巡防隊，警務公所消防隊，第八鎮工程營守衛督署。派協統黎元洪駐防漢陽兵工廠。辛亥八月十八日晚，巡防隊拿獲黨人數十名，破獲革命黨機關數處。武昌新軍，久已傾向革命，時以名册被搜，聞瑞澂將嚴行查緝，於是人人自危，故不守二十五日與黨人共同起事之約，即於十九日（即陽曆十月十日）舉事。十九日夜九時，工程第八營左隊營中熊秉坤首先發難，改稱民軍，殺督隊官阮榮發。步兵二十九三十兩標，亦殺管帶排長等五人繼起。

攻楚望臺，佔火藥庫。十五協兵士，已同時齊集大操場，與工兵聯合，悉運子彈至蛇山下關馬廠諮議局旁，分兵三處，一駐鳳凰山，一駐蛇山，一駐楚望臺，各架礮轟擊督署。二十日，瑞澂、張彪及藩司連甲皆棄城逃。革命軍改諮議局爲軍政府，推黎元洪爲鄂軍都督。未幾漢陽漢口亦皆爲革命軍所佔領。

各省黨人，聞武昌起事，均先後響應，前後不逾三十日，革命軍已得十餘行省。滿清政府大懼，急命陸軍大臣蔭昌統率近畿陸軍兩鎮赴鄂，又令薩鎮冰率海軍即日赴援，與革命軍開戰。民軍奮勇攻擊，卒以衆寡不敵，放棄漢口漢陽。時南京已爲革命軍所得，清廷知難應付，乃下令停戰議和。

時袁世凱爲清內閣總理，派唐紹儀爲代表，與民軍代表伍廷芳開議和會於上海，不成，改由直接電商。時孫中山先生方回國，各省代表在南京組織臨時政府，舉中山先生爲臨時大總統，黎元洪爲副總統，組織內閣。以清室無誠意，乃積極籌辦北伐。適北方將領知大勢所趨，無可挽救，亦紛紛通電贊成共和，清帝乃於二月十二日降旨退位。

清帝既退位，中山先生乃向參議院辭職，推舉袁世凱自代。參議院乃開臨時大總統選舉會，袁世凱當選為中華民國臨時大總統。以種種關係，袁氏不能至南京就職，參議院乃允其在北京就職。袁總統就職後，即從事於國務院之組織，添設國務總理。得參議院之同意，以唐紹儀為國務總理，開員如下：外交陸徵祥，內務趙秉鈞，財政熊希齡，陸軍段祺瑞，海軍劉冠雄，教育蔡元培，司法王寵惠，農林宋教仁，工商陳其美，交通由國務總理兼任。

二、同盟會之公開與政黨之紛起

南北既統一，民國政府既成立，各派羣起組織政黨，以期奪取政權。抱革命主義而祕密結合之中國同盟會，至是亦改為公開之政黨，其政綱凡九條：

(一) 完成行政統一，促進地方自治。

(二) 實行種族同化。

(三) 採用國家社會政策。

(四) 普及義務教育。

(五) 主張男女平權。

(六) 勵行徵兵制度。

(七) 整理財政，釐定稅制。

(八) 力謀國際平等。

(九) 注重移民開墾事業。

同盟會以孫中山先生爲總理，黃興、黎元洪爲協理，以宋教仁、胡漢民、馬君武、劉揆一、平剛、張繼、李肇甫、汪精衛、居正、田桐爲幹事。支部遍設各省，南京臨時政府時代，勢力極大。南北統一以後，中山先生放棄政權，唐紹儀及同盟會四總長後亦辭職，黨勢乃漸衰。

當時同盟會之敵黨有統一黨、共和黨、民主黨三黨。統一黨由張謇派之預備立憲公會與章炳麟派之光復會聯合而成，以不滿於同盟會，故不惜與同盟會之政敵袁世凱攜手。共和黨由國民協進會及伍廷芳派之國民黨聯合而成，亦爲袁氏之與黨。民主黨由共和建設討論會、共和統一會、共和俱進會、共和促進會、國民新政社聯合而成。爲抵抗國民黨起見，此

統一、共和、民主三黨，於民國二年五月聯合而組進步黨。

三、同盟會之改組爲國民黨

民國元年八月，臨時參議院氣焰甚高，議員競爭甚烈。時參議院中大小黨派無數。接洽非易，各大黨欲謀擴張勢力，奪取政權，皆設法併合小黨。同盟會宋教仁遂亦併合同盟會主義相接近之統一共和黨、國民共進會、共和實進會及國民黨，合組爲國民黨。由五政黨各舉委員，協議合併計劃與進行事項。同盟會委員爲宋教仁、仇亮、劉彥等，統一共和黨爲馬麟翼、彭允彝、王樹聲等，國民共進會爲王寵惠、徐謙、陸定等，共和實進會爲董之雲、許廉、夏仁樹等，國民黨爲虞熙。協議結果，衆意愈同。乃於八月二十五日舉行正式成立大會，改名國民黨。此次改組，雖非中山先生之本意，然先生亦未加以反對，故開成立會之日，先生親自出席，爲極長之演說，隨即發表宣言及政綱。其宣言中有云：「一國政黨之興也，祇宜兩黨對峙，不宜小羣分立。」似採兩大政黨對立主義。政綱共分五項：

(一) 促進政治統一；

(二) 發展地方自治；

(三) 實行種族同化；

(四) 注重民生政策；

(五) 維持國際和平。

觀此政綱可知是時國民黨之領袖人物，專圖黨勢之擴張，不思主義之貫徹，故將同盟會時代之國家社會政策，土地國有，男女平權等主張，悉行拋棄，以遷就其他四小黨黨員之政見，並由急進一變而為漸進，由革命的同盟會一變而為普通政黨的國民黨矣。

國民黨之組織，完全為普通政黨組織之形式，有理事九人，參議三十人，候補參議十人。理事為孫文、黃興、王人文、王芝祥、宋教仁、張鳳翽、吳景濂、王寵惠、貢桑諾爾布；參議為閻錫山、張繼、李烈鈞、胡漢民、沈秉堃、溫宗堯、陳錦濤、陳道一、莫永貞、褚輔成、松毓、楊增新、于右任、馬君武、田桐、譚延闓、張培爵、徐謙、王嘉荃、姚錫光、趙炳麟、柏文蔚、孫毓筠、景耀月、虞汝鈞、張琴、王傅炯、曾昭文、蔣翊武、陳明達；候補參議為尹昌衡、袁家普、唐紹儀、唐文治、胡漢民、王紹祖、黃金釗、許

廉、夏仁樹、賀國昌。

四、國民黨之興盛

民國元年，國民黨實力甚厚，山西都督閻錫山，陝西都督張鳳翽，江西都督李烈鈞，安徽都督柏文蔚，湖南都督譚延闓，四川都督尹昌衡，廣東都督胡漢民，廣西都督陸榮廷，皆隸國民黨籍。此與第一次國會議員選舉時國民黨之得勝，大有關係。

正式國會之參眾兩院議員選舉法，早由臨時參議院制定公布。元年十二月初旬，辦理兩院初選，至二年二月上旬，複選亦告完畢。總計各黨所獲議員，國民黨竟佔絕對多數。茲將兩院中各黨實佔議席之數目列表於左：

黨籍	議院名	人數	議院名	人數	合計
國民黨	衆議院	二六九	參議院	一二三	三九二
共和黨	同	一一〇	同	五五	一七五

統觀右表，可知國民黨所佔議席之多，即合共和、統一、民主三黨所佔之議席合併計之，尚不及其三分之二，可謂盛矣。

五、國民黨之分裂與衰落

國民黨之獲勝利，甚觸袁世凱之忌，袁氏乃一面組織大與黨，一面密謀暗殺宋教仁。共和、民主、統一三黨，素不滿於國民黨，乃合組進步黨，為政府之與黨，以與國民黨對抗。袁世凱既有此與黨，乃開始作破壞國民黨之謀，用金錢收買國民黨中意志不堅定之黨員，以厚己

統一黨	同	右	一八	同	右	六	二四
民主黨	同	右	一六	同	右	八	二四
跨黨者	同	右	一四七	同	右	三八	一八五
無所屬	同	右	二六	同	右	四四	七〇
總計	同	右	五九六	同	右	二七四	八七〇

方之力，祕密派人暗殺宋教仁，使國民黨失去領袖，於是整齊偉大之國民黨，遂致四分五裂，發生以下之五小政團：

一、相友會 會長劉揆一，副會長陸贄宸，會員二十三人，與國民黨表示不合作。

二、政友會 爲景耀月、孫毓筠所首創，其會員隸國民黨籍者占五分之三，隸進步黨籍者佔五分之二，共六七十人。

三、癸丑同志會 爲湖南衆議員陳家鼎等所組織，幹部人物有劉公、張我華、馬小達、韓玉辰諸人。會員十餘人，實爲國民黨之別動隊，與政友會相友會之反對國民黨者有別。

四、集益社 爲朱兆莘等所組織，有社員二十餘人。

五、超然社 爲國民黨議員郭人漳、夏同龢等所組織，有社員三十餘人。

國民黨既分裂如是，遂失舊日之勢力，一任袁世凱之玩弄矣。自袁世凱祕密派人刺殺宋教仁後，國民黨同志異常憤激，起兵聲討，卽所謂二次革命是也。惜不幸而失敗，於是全國實力悉集於袁氏一人之身。國民黨黨員，自宋案發生後，分激烈與穩健兩派，激烈派南下加

入討袁穩健派則仍留京，欲依據法律制定憲法以束縛袁氏。而袁氏對於在北京之國民黨員，屢加重大之壓迫，逼吳景濂、徐樹錚、李烈鈞、柏文蔚、陳其美等黨籍，以串通亂黨為名，逮捕國民黨議員朱念祖、張我華、丁象謙、高蔭藻、常恆芳、褚輔成、劉恩格等七人。

袁氏既日益專橫，顯有帝制自為之意，國民黨議員深知之，欲以制定憲法限制袁氏，以作最後之奮鬥，蓋憲法起草委員會六十委員中屬國民黨籍者獨占多數也。茲將委員姓名及黨籍列表於左：

參議員

國民黨 湯漪、楊永泰、宋淵源、朱兆莘、高家驥、蔣會煥、段世垣、金永昌、張我華、蔣舉清、呂志伊、穆乃祺、金兆棧、王鑫潤，共十四人。

進步黨 王家襄、丁世嶧、藍公武、曹汝霖、陸宗輿、王揖唐、解樹強、陳銘鑑、阿穆爾靈圭、陳善，共十人。

政友會 趙世鈺、王用賓、石德純、金鼎勳，共四人。

共和黨 饒應銘、車林桑多布，共二人。

衆議員

國民黨 張耀曾、李肇甫、伍朝樞、易宗夔、褚輔成、彭允彝、谷鍾秀、孫潤宇、孫鍾、楊銘源、徐秀鈞、劉恩格、楊景南、李芳，共十四人。

進步黨 汪榮寶、劉崇佑、王印川、李國珍、汪彭年、王敬芳、李慶芳、孟森、張國溶，共九人。

政友會 史澤咸一人。

超然社 夏同龢一人。

此六十人中，國民黨、政友會、超然社三派議員皆反對政府，計共三十四人，贊成政府者，計共二十六人。至民國二年十月三十一日，全部憲法十一章一百十二條完全脫稿。袁世凱早慮憲法之制定，將使己之行動感受束縛。乃於十一月四日，假二次革命爲內亂之名，以武力解散國民黨，取消國民黨籍之國會議會，追徵議員之證書徽章。初追徵三百五十餘人，兩院猶足法定人數，有開會希望；繼又追徵二次革命前已退出國民黨籍者八十餘人，使國會不能

滿足法定人數，事實上遂陷於消滅之狀態，而憲法草案，亦被擱置。後袁氏復下令停止兩院職務，而國會遂完全廢止，國民黨與他黨同歸消滅。



第五章 中華革命黨

一、革命精神之恢復

民元之改同盟會爲國民黨，無異將革命的黨改爲普通的政黨，拋棄本來之革命政策，而改用議會政策。然自二次革命討袁失敗以後，國民黨被袁氏以武力解散，議會政策遂完全失敗。中山先生知袁氏之將帝制自爲，覺有恢復同盟會時之革命精神之必要。且自同盟會改組爲國民黨後，範圍雖見擴張，然精神全非，黨員複雜，官僚敗類混雜其間，以致內部意見紛歧，一無所成，故決意恢復民國以前之本來面目。乃解散普通政黨式之國民黨，於民國三年，重組中華革命黨於日本，標出革命二字，重整旗鼓，以與惡勢力奮鬥。當時入黨手續極嚴，黨員均須立誓服從先生命令，以求黨內之一致，蓋其時舊同志多已灰心，故不得不然也。黨既組成，乃散布黨員於各省，作反對帝制之宣傳，故袁氏帝制未成，而反對之人心已備，帝

制一發，各省即起而撲滅之。

二、袁世凱之稱帝

袁世凱以軍警包圍國會而獲選爲正式總統後，復解散國會，公布新約法，大總統之權力日大，已無形中將共和變爲專制矣。民國二三年之際，北京已有共和不適中國國情之論。至四年八月，公府憲法顧問美人古德諾，忽發表共和與君主一文，以爲中國如用君主制，當較共和制爲宜。日人有賀長維作觀奔閨評，亦鼓吹君主立憲。同時楊度、孫毓筠、嚴復、劉師培、李燮和、胡英等，發起組織籌安會，後改稱憲法協進會，專在促帝制之實現。而薛大可主辦之亞細亞日報，烏澤聲主辦之國華報，王印川主辦之黃鐘日報，梁士詒、沈雲沛等所組織之勸進請願聯合會，皆竭力贊助帝制之進行。袁氏又命令發表參政院以代行立法機關，以爲法律之根據。數月之間，各省公民紛紛向參政院請求改更國體。而當時指使召集之國民會議，又全體投票贊成君主立憲，並一致擁戴袁世凱爲皇帝。袁氏下令承認爲帝，改明年爲洪憲元年，並大頒爵賞。於是經數十年之奮鬥而締造之中華民國，遂中斷矣。

三、三次革命

袁世凱偽造民意，推翻共和，帝制自爲，舉國反對。時陳其美在東京與中山先生議決，欲以廣東爲發難之地，舉兵討袁。路過上海，革命黨同志以上海方面海陸軍聯絡極多，頗有希望，陳亦以上海確有可爲，乃謀先舉事於上海。時上海鎮守使爲鄭汝成，甘心阿附袁氏，革命軍欲取上海，必須先去鄭汝成。乃派黨員王曉峯、王明山二人，乘汝成赴日本領事館過白渡橋時刺殺之。鄭汝成既死，袁氏大恐，派楊善德爲淞滬護軍使。陳其美乘人心浮動，袁氏佈置未妥之際，準備發動，長江及江浙同志又催促，適袁氏復有令肇和艦開赴廣東之訊，黨人以與肇和艦早有聯絡，不欲其離開上海，乃於十二月五日，派黨人三十餘名，攜帶手槍炸彈，乘小汽輪往襲肇和艦，上海學生軍陳可鈞等立即響應，遂得肇和駛入浦江，發砲攻擊製造局。岸上黨人即分別佔領電報局、電話局、巡警總局、工程總局等重要機關。陳其美親率同志向華界出發，適袁軍大隊前來，革命軍以武器不足，不能支持，乃退。楊善德薩鎮冰更收買應瑞通濟兩艦，圍攻肇和，黨人死傷甚多，遂棄艦而逃。

肇和艦起事失敗未久，卽有雲南唐繼堯蔡鍔護國軍之起義。蔡鍔字松坡，當袁氏圖謀帝制之時，方居北京，陽稱贊成帝制，暗中密謀反抗。後乘隙出京至津，稱往日本養病，乃轉道入滇，勸雲南將軍唐繼堯反對帝制，唐卽表示贊成。遂於四年十二月二十三日致電袁世凱，請誅帝制禍首楊度、孫毓筠、嚴復、劉師培、李燮和、胡英、段芝貴、朱啓鈴、周自齊、梁士詒、張鎮芳、袁乃寬、顧鼐等十三人，以謝天下，限二十五日上午十時以前答覆。屆時竟無覆電，遂於二十五日通電各省，宣布獨立。五年一月一日，雲南都督府成立，廢除將軍及巡按使名義，公舉唐繼堯爲都督，以戴戡任可澄爲參贊，稱其軍曰護國軍，以蔡鍔爲第一軍總司令，李烈鈞爲第二軍總司令，分三路出兵，向川邊、湘邊、桂邊進攻。

中華革命黨黨員，早已分布各省，準備舉事，以推倒袁世凱。聞雲南護國軍起義，卽聯絡各省當局而響應。貴州夙與雲南有聯絡，護軍使劉顯世於護國軍未起以前，卽表示贊成舉義，徒以兵力薄弱，故不敢動。至戴戡所部抵貴陽，卽於一月二十七日宣布獨立，舉劉顯世爲都督。

護國軍起事以後，袁氏積極爲軍事之預備，派曹錕、張敬堯率師入川，馬繼增防堵湘西，復命龍覲光由粵入滇，對雲貴取大包围之策。蔡鍔率滇軍入川，屢戰屢勝，而四川之團練，亦皆遙應滇軍。此外黔軍之入湘，李烈鈞部之入桂，亦咸獲勝利。

廣西將軍陸榮廷早有反對帝制之意，惟軍事布置未完，餉械未足，故仍與北京政府敷衍。至三月十五日，一切布置已妥，乃電袁世凱，勸其即日辭職，並宣布獨立，推陸榮廷爲都督。自貴州廣西繼雲南而宣布獨立後，袁氏大恐，知帝制已不可成，乃於三月二十二日下令取消帝制，仍爲總統。護國軍要求袁氏退位，袁猶不捨，於是廣東、浙江、陝西、四川、湖南等省，亦相繼宣告獨立矣。

廣東將軍龍濟光，效忠袁氏，盤據省城，不肯獨立。革命黨同志乃在外縣分謀起事，自五年一月以來，先後舉事於廣州之增城、新會、香山、寶安、台山、清遠、順德、花縣、肇慶之開平、鶴山、新興、高明、恩平、惠州之惠陽、博羅、韶州之曲江、英德等處，或聯絡軍隊，或聯絡土人，以與龍氏之軍隊奮鬪。旋龍覲光攻滇之軍，被困於桂邊、潮州、汕頭，欽廉先後獨立，加入護國軍，粵省軍

艦寶壁、江大江固等又爲革命軍所有，龍氏之地位日益岌危，乃會同海陸軍將領及省城官紳，議決獨立，即電中央聲明脫離關係。

浙江軍隊，聞廣西獨立後，即思響應，惟以將軍朱瑞態度不明，又恐淞滬北軍來犯，故未敢發動。至四月上旬，童葆暄、呂公望、王文慶等祕密會議，決定起事，乃率全軍入城進攻軍署，朱瑞聞變出走，遂宣告獨立，先推巡按使屈映光爲都督，屈不就，乃公舉呂公望爲都督。

陝西各地會黨，聞滇省起義，即蠢蠢欲動。時陳樹藩所部陝軍，在陝稱勁旅，將軍陸建章懼其響應滇軍，調往陝北。陳在陝北與民軍聯絡，在三原宣告獨立，分兵三路，進攻西安。陸建章知難抵抗，遂以陝西讓陳。公推陳樹藩爲陝西都督，宣布獨立。

四川自滇軍侵入後，各地民軍紛紛起事，將軍陳宦初尙布置守禦，後曹錕、張敬堯等袁軍入川，川民不堪，紛紛要求陳氏宣布獨立，陳氏爲環境所迫，遂電袁世凱勸其退位，並宣布獨立，改將軍爲都督，與滇黔軍取一致行動。

湖南素爲民黨淵藪，雲南起義之初，湘垣即紛傳黨人將在長沙謀獨立。二月二十一日

晚，有黨人四十餘名，挾炸彈手槍攻擊督署，爲衛兵擊退，未獲成功。及滇黔兩軍侵入湘西，節節進取，桂軍亦進擊湘南之永州，湘西鎮守使田應詔在鳳凰縣宣布獨立，衡陽、耒陽、彬縣復爲民軍佔領，湘局岌岌，將軍湯薈銘乃於五月二十九日宣布獨立。

陳其美在滬，自肇和艦之舉失敗後，仍力謀起事，不成，乃遣楊虎赴江陰發難。四月十六日佔領江陰礮臺，宣布獨立，而吳江、震澤先後亦爲革命軍所得。五月五日，上海黨人百餘名，復由陳其美率領，圖襲吳淞江之策電警艦。革命行動，直至袁氏死後始停止進行。

此外山東有革命黨人居正以東北軍總司令名義，率兵攻佔十餘城，進襲省城，迫將軍靳雲鵬電致北京要求袁氏退位。而湖北、安徽、奉天、江西、福建等省，亦均有黨人之活動。

四、共和之再造與政黨國民黨之復活

袁世凱聞各省將軍紛紛宣告獨立，羞憤交集，遂於五年六月六日病死於新華宮。黎元洪依法繼任爲大總統。於是南方軍政府宣告撤銷，各省取消獨立，一致擁護中央。八月一日，參衆兩院同時開會，而沉寂三年之各政黨，遂乘機而再起，政黨國民黨亦因而復活，嚴然有

民國元年之氣象焉。

南北統一以後，國民黨系全體，經張繼諸人之斡旋，曾爲一度之結合，組織憲法商榷會，在國會中佔議席四百，宛若一大政團。其幹部人物，則龔煥辰、彭允彝、張瑞璣爲文書科正副主任，王有蘭、劉盟訓、葉夏聲、馬君武、吳淵、楊擇、陳洪道、田桐、王樞爲辦事員；林森、朱念祖、蔣舉清爲議事科正副主任，王洪身、秦廣禮、張魯泉、王傑、郭同、覃振、鄒魯、呂志伊、金永昌爲辦事員；李肇甫、王法勤、陶保晉爲交際科正副主任；楊銘源、張浩、彭漢遺爲會計科正副主任，盧信、楊渡、方潛、宋淵源、劉冠三、周之翰、李式璠、蒙經、張大義爲辦事員；牟琳、李有忱、張華我爲庶務科主任，張書元、董耕雲、鄒林泉、焦易堂、陳策、陳蓉光、劉奇瑤、祁連元、張樹稱爲辦事員，然雖號稱統一，內部分子頗複雜，含有客廬、丙辰俱樂部、綽園三系。客廬系屬國民黨之穩健派，由張繼所領袖之一團體爲中心，谷鍾秀系加入最早，吳景濂系旋亦加入，黨員共二百六七十人。丙辰俱樂部系多爲舊國民黨中之急進分子，在國會中似可代表孫中山先生，黨員約五六十人，以林森、居正、田桐、褚輔成、馬君武、白逾桓等爲主要人物。綽園系爲舊進步黨中孫洪伊、丁

世暉之一派，反對帝制時在上海與革命黨取一致行動。黨員亦約五六十人。

此三系之結合，本不堅固，故易分裂。客廬系中之谷鍾秀張耀曾一派，對於段祺瑞內閣以利益關係，主張擁護，而丙辰俱樂部與韜園兩派，則主張破壞，復以其他意見之衝突，谷張等遂脫離客廬派而別組政學會。客廬系之嫡派人物如張繼、吳景濂、王正廷等，亦復改組為益友社，而丙辰俱樂部與韜園又離益友社而獨立，憲法商權會遂完全消滅。後韜園與丙辰俱樂部派之馬君武、溫世霖諸人結合，改組為民友社，以反對段內閣之外交政策，在國會中甚為活動。

第六章 護法非常國會時代之國民黨

一、國會之解散與西南之護法

袁世凱死後，黎元洪繼任爲大總統，以段祺瑞爲內閣總理。段祺瑞應協約國之請，主張對德宣戰，黎元洪不以爲然。國會中之國民黨議員，亦竭力反對段氏之政策，致段氏提出對德宣戰案於參衆兩院時，亦未得兩院議員之通過。段祺瑞怒國民黨議員之牽制，運動各省督軍，聯合呈請黎總統，催開軍事會議，解散國會，直隸（督軍曹錕）河南（趙倜）山東（張懷芝）奉天（張作霖）陝西（陳樹藩）福建（李厚基）山西（閻錫山）湖北（王占元）江西（李純）吉林（孟恩遠）等省督軍及安徽省長倪嗣冲，皆一致贊成，遂上聯呈於黎總統。黎氏接督軍團之聯呈，大怒，知係出於段氏之運動，乃下令免段祺瑞職，以外交總長伍廷芳代任總理。

段祺瑞免職後，督軍團大譁，安徽、河南、山東、奉天、浙江、陝西等省，先後宣布獨立。黎總統懼，乃電召安徽督軍張勳來京商國是。張勳帶兵五千，自徐州起程，至天津，即電京要求解散國會。黎總統不得已允之，張勳乃由天津入京。張與保皇黨領袖康有爲往來甚密，在北上以前，已議定復辟計劃，一至北京，即於六年七月一日擁廢帝宣統復辟，迫黎元洪退位。中山先生聞訊立命各省革命黨軍人出師討賊，而段祺瑞亦在天津馬廠組織討逆軍，向北京進發，未幾即佔領北京，張勳敗逃荷使館。事平後，迎副總統馮國璋入京代理總統職務，段祺瑞仍爲內閣總理。

段祺瑞既重行組閣，憤國會不通過對德宣戰一案，故不將國會恢復，另行召集臨時參議院，致立法機關依然中斷。西南各省遂起而宣布護法，舊國會議員紛紛南下，乃開非常會議，議決組織軍政府，舉孫中山先生爲海陸軍大元帥，唐繼堯陸榮廷爲副元帥。

二、南方國會之解剖

南方既召集國會，昔日之國民黨分子，悉集於廣州。然此時政黨分子複雜，不能一致。若

加以分析，則南方國會實有政學會、益友社、民友社、新新俱樂部等派別。

政學會系自稱爲舊國民黨之穩健派，實則由南關五十號派與石行會館派合併而成。南關五十號派爲民五政學會之一部分，在北京時曾與研究系攜手。其中堪稱嫡系者，不過三十人，擁岑春煊爲首領，輔之以章士釗、冷遙，以張耀曾、谷鍾秀爲頭腦，利用莫不相關之莫榮新爲傀儡，以攫取南方政府之一切實權。其主張與北方之研究系極近似。石行會館派一部出於北京平社，曾由共和黨併入進步黨者，一部出於北京制憲時之憲法研究會。到粵以後，由李根源竭力結合而成。以劉治洲、徐蘭聚、劉彥等爲幹部人物。此系與民友社系絕不能相容。

益友社系之機關部，卽爲褚寓，號稱國民黨嫡派之溫和派，爲南方國會中之惟一多數黨，由憲法商權會分組而成，以吳景濂、褚輔成、王正廷等爲領袖。此派態度極溫和，遇政友會與民友社發生爭議之時，恆立於調和之地位。桂系與之頗表同情，與唐紹儀、唐繼堯、劉顯世亦接近。

民友社以照霞樓爲機關部，係舊國民黨嫡派中之急進派，由三部分合組而成。一爲由中華革命黨而丙辰俱樂部所改組之民友社，以林森、謝持、馬君武、居正、田桐等爲中堅人物。一爲由脫離進步黨之分子所組織之韜園俱樂部，後併入民友社，以孫洪伊、王乃昌、彭介石、萬鴻圖等爲中堅人物。一爲共和派，卽舊共和黨之議員，以王湘、高振霄等爲中堅人物。民友社以地位與歷史關係，與政學會及桂系均不相能，故以後卒致破裂。

新新俱樂部與益友社、民友社同稱國民黨議員，純爲新補兩院議員之集團，在舊國會中，議席近二百人，政見多與褚寓表同情。惟以新入政海，缺乏經驗，故頗有喜唱高調而受人目爲激烈派者。

此外尚有蒙古俱樂部、文社、廣東議員俱樂部、廣西議員俱樂部、雲南議員俱樂部等小團體，不屬於以上各系，在國會中獨自行動。惟所佔議席極少，故勢力亦極微。

三、軍政府之改組及南北之議和

時北洋派亦分直皖兩系，直系主張議和，皖系主張用兵，以武力統一西南。南方之政學

會系傾向議和，桂系主張聯直，與孫中山先生之純粹護法宗旨截然不同。桂系及政學會系首領岑春煊、章士釗、陸榮廷、李根源等，在廣州組織聯合會議，設軍事、財政、外交、議和等代表，不曾爲與北方政府議和之機關也。

七年四月十四日，湯漪、楊永泰起草之軍政府改組案，得羅家衡等四十人之連署，提出於國會非常會議，唐繼堯、劉顯世等實力派亦多贊成，雖有民友社系議員之竭力反對，卒於五月四日以大多數議員之贊成，照原案通過。五月十八日，公布中華民國軍政府組織大綱，改獨裁制爲合議制。二十日，推定岑春煊、唐紹儀、伍廷芳、唐繼堯、陸榮廷、林葆懌及中山先生七人爲總裁。中山先生憤兩院議員贊成改組軍政府，爲桂系政學會系所給，以致不能實現救國大計，乃向非常國會辭職，偕戴天仇、朱執信、葉夏聲等離粵赴滬。而岑春煊則由滬南下赴粵就職。七月六日，岑春煊、唐繼堯、陸榮廷、伍廷芳、林葆懌五政務總裁連名宣布西南政府成立，以岑春煊爲首席政務總裁。此次改組之結果，桂系及政學會系大獲勝利，民友社系則幾無立足之餘地。

改組後之軍政府，其目的與以前之革命政府大異，極希望與北方議和，故直派師長吳佩孚、通電主張開和平會議後，軍政府即首先覆電贊同。時南北和平之空氣甚厚。熊希齡、張謇、蔡元培、王寵惠、莊蘊寬、孫寶琦、周自齊、張一麐、王家襄、谷鍾秀、丁世嶧、徐佛蘇、文羣、汪有齡、王克敏、王祖同等二十一人，拍發通電，組織和平期成會。各國駐華公使，復勸告南北息爭。於是南北政府，遂各派代表，開和會於上海。八年二月二十日，和平會議行開幕式，至五月十三日，以南方提出八條，限時答覆，遂破裂。南方總代表唐紹儀向軍政府辭職，北方總代表朱啓鈴及其他代表，亦全部撤回。後北方復派王揖唐為議和總代表，南方軍政府以王揖唐屬安福系，與南方民友社系頗有聯絡，故表示反對。及直皖戰起，安福系失敗，王揖唐逃亡日本，和平會議遂無形消滅。

四、政學會系與桂系之失敗

中山先生雖離粵赴滬，民友社議員猶多留居廣州。八年十月十八日，兩院民友社議員聯絡會，提出彈劾政務總裁岑春煊案，政學會議員絕對反對，益友社議員主付審查。民友社

議員復提出改組軍政府案。此皆不信任岑春煊之表示也。岑遂通電辭職。然陸榮廷、唐繼堯、莫榮新等實力派反對軍政府改組，民友社議員之主張遂不得實現。

直皖戰爭之時，廣東莫榮新欲借攻閩爲名，乘機剷除陳炯明所部之粵軍，表面則力示無併吞之意。陳氏知其謀，覺必不可免，乃一面向莫催發餉彈，一面密爲戰備，乘桂系軍隊前方部署未備之時，即於九年八月十二日在漳州警師，分三路向粵邊攻擊，旬日之間，克復潮梅。莫氏急調沈鴻英、林虎等部往東江堵截。越數日，粵軍攻陷河源，進逼惠州。時西江、北江空虛，革命軍乃乘機突起，虎門礮臺亦受朱執信等之運動而宣布獨立，警察廳長魏邦平、廣惠鎮守使李福林，復在河南宣布獨立，而江門警備軍司令陳德春，亦與魏李取一致行動。高雷、欽廉各屬相繼獨立，瓊州亦爲革命軍佔領。旋粵軍復攻陷惠州。桂系至此，勢窮力竭，岑春煊乃通電解除軍府之職，莫榮新率桂軍退出廣州。東江、桂軍繞道北江返桂。

此次推翻政學會系與桂系之勢力，陳炯明之功最高，衆乃推陳爲廣東省長，兼任粵軍總司令。中山先生及國會議員以粵局大定，相繼返粵。十年四月七日，國會議員開非常會議，

議決中華民國政府組織大綱，選舉中山先生爲大總統。五月五日，中山先生就職，任伍廷芳爲外交總長，陳炯明爲陸軍兼內務總長，李烈鈞爲參謀總長，湯廷光爲海軍總長，唐紹儀爲財政總長。

時北方政府以餉彈接濟陸榮廷，命其出兵援粵。陸氏時思恢復粵省地盤，又得北方之接濟，遂積極籌備出兵閩粵。孫大總統命陳炯明率所部出駐肇慶，進窺梧州，命許崇智由北江入桂夾攻，命李烈鈞率贛滇軍，谷正倫率黔軍，進攻桂林。此外復調湘軍入桂助戰，旋桂將劉震寰引粵軍入佔梧州。梧州爲廣西全省之咽喉，既爲粵軍所佔，桂軍無可抵禦，各將乃急謀自保，與陸榮廷脫離關係。後粵軍佔南寧，滇黔各軍攻入桂林，粵軍復佔龍州，桂軍非降卽潰，陸榮廷乃隻身逃往安南。廣西全省遂全入護法政府之勢力範圍內矣。

五、北伐與陳炯明之叛變

兩粵既定，孫大總統卽擬乘時北伐，以貫徹護法之初衷，乃提出北伐案於國會，經國會開非常會議通過。孫大總統命陳炯明先返廣州，擔任北伐軍後方接濟之責。親自出征，在桂

林組織大本營，統率各軍北伐。執意在桂數月，陳氏毫末與以餉彈之接濟，諸將乃決改道北伐，移大本營於韶關，回兵廣東，向西江進發。陳氏疑北伐軍改道，恐將翦滅彼之勢力，乃提出辭職，並返惠州。孫大總統免其省長及粵軍總司令之職，仍留任陸軍總長，冀其悔悟。

十一年四月，孫大總統在韶關誓師北伐，以李烈鈞爲中路，許崇智爲左翼，黃大偉爲右翼，向贛邊進發。開戰以後，節節勝利，庚嶺以北，南安一帶，次第克復。六月十二日，攻陷贛州，江西督軍陳光遠棄衆逃亡，江西將士本多與李烈鈞聲氣相通，故贛州既下，幾有可不戰而得南昌九江之勢。

方北伐軍深入江西之際，陳炯明受吳佩孚指使，謀乘機搗亂後方。六月十五日，陳軍諸將，集合白雲山，密議圍攻總統府及堵截北伐軍回救方略，約定是夜二時舉事。是夜十時，有某軍官以電話報告孫大總統，言今夜粵軍恐有不軌行動，務請總統離府。及至午夜，秘書林直勉與參軍林樹巍前後至府報告，言今夜消息險惡，請速離府。孫大總統不之信。迨至三時，林秘書等復至府，力勸總統出府，總統以爲戡亂平逆，是己之責，如力不如志，惟有以一死殉

國，以謝國人，不肯離公府。林秘書等乃以數人臂力強挽孫大總統出府，步行至長堤，安抵海珠之海軍司令部，與溫樹德司令等同登楚豫艦，召集各艦長，計議應變戡亂之策。

次日，各行政機關，盡爲陳軍佔據。洪兆麟所部，圍攻總統府，府中衛士及警團竭力抵抗，陳軍數次衝鋒，均不得入。後陳軍用速射礮注射公府，並用煤油燒燬由粵秀樓至公府之棧橋。衛士彈盡援絕，乃被陳軍繳械。陳軍乃入府搜索，遍覓不見，始知孫大總統已於昨夜步行脫險。

孫大總統至軍艦後，以陸地盡爲陳軍所得，乃率艦隊集中黃埔，準備進攻，並飛調北伐軍回師平亂。十七日，孫大總統率永豐、永翔、楚豫、豫章、同安、廣玉、寶璧各艦出動，由黃埔經車歪砲臺駛至白鵝潭，命各艦對大沙頭、白雲山、沙河、觀音山等處發砲射擊，陳軍紛紛棄械逃遁。各艦乃沿長堤向東漸進，照指定目標發砲，陳軍死者數百人。以陸上部隊不能如期發動，陳軍得潰而復聚，其亂卒不能平。各艦乃復泊黃埔，會議再攻。

時陳軍圖謀賄賣海軍叛變，至七月八日，海圻、海琛、肇和三大艦，駛離黃埔。孫大總統乃

命其餘各艦，由黃埔上遊經海心崗駛往新造村附近，掩護長洲要塞，以防魚珠陳軍之襲擊。

命其餘各艦，由黃埔上遊經海心岡駛往新造村附近，掩護長洲要塞，以防魚珠陳軍之襲擊。九日，魚珠砲臺之陳軍渡河襲擊長洲要塞，要塞司令馬伯麟所部開槍應敵，陳軍死傷甚多，不圖海軍陸戰隊孫祥夫所部，反戈相向，引敵登陸，長洲要塞遂爲陳軍所得。孫大總統乃命各艦集中新造西方，收容要塞潰兵，準備進攻車歪砲臺，以爲海軍之根據地。十日上午二時，孫大總統命永豐、楚豫、豫章、廣玉、寶璧等艦，由海心岡駛至三山河口。九時，以座艦當先，各艦隨後，鼓勇直進，戰爭劇烈，各艦通過車歪砲臺，直駛省河之白鵝潭停泊。時北伐軍已返旗，在韶關與陳軍激戰，互有勝敗，孫大總統以地方爲重，不令海軍發砲攻擊，惟堅守以待北伐軍之收復廣州而已。

至八月九日，孫大總統接前敵失敗確息，乃召集各艦長會議，皆謂贛南失陷，南雄不保，前方腹背受敵，戰局必危，總統株守省河，有損無益，不如離粵赴滬，另圖補救。孫大總統乃離粵北上，於八月十三日抵滬，即於十五日發布以下之護法總統宣言：

「六年以來，國內戰事，爲護法與非法之爭。文不忍艱難創造之民國，墮於非法者之手，

倡率同志，奮鬪不息。中間變故迭起，護法事業，蹉跎數載，未有成就，而民國政府，遂以虛懸。國會知非行權無以濟變，故開非常會議，以建立政府之大任，屬之於文。文爲貫徹護法計，受而不辭。就職以來，激勵將士，出師北向，以與非法者戰。最近數月，贛中告捷，軍勢遠振。而北軍將士，復於此時爲尊重護法之表示。文以爲北軍將士，有此表示，則可使分崩離析之局，歸於統一，故有六月六日之宣言，願與北軍將士提攜，以謀統一之進行。不圖六月十六日護法首都，突遭兵變，政府燬於砲火，國會遂以流離。出征諸軍，遠在贛中，文僅率軍艦，倉卒應變。而陸地爲變兵所據，四面環攻，益以礮壘水雷，進襲不已。文受國會付託之重，護法責任，繫於一身，決不屈於暴力，以失所守。故冒險犯難，孤力堅持，至於兩月之久，變兵卒不得逞。而軍艦力竭，株守省河，於事無濟。故以靖亂之任，付之各處援師，而自來上海，與國人共謀統一之進行。迺念兩月以來，文武將佐，相從患難，傷亡枕藉。而外交總長伍廷芳，以國元老，憂勞之餘，竟以身殉，尤深愴惻。文之不德，統馭無方，以至變生肘腋，咎無可辭。自兵變以後，已不能行使職權，當向國會辭職；而國會流離顛沛之餘，未能集會，無從提出。至於此次兵變，文實不知其所由起。據

兵變主謀陳炯明及諸從亂者所稱說，其辭皆支離不可究詰。謂護法告成，文當下野耶？六月六日，文對於統一計畫，已有宣言，爲天下所共見。文受國會付託之重，雖北軍將士，有尊重護法之表示，猶必當審察其是非與誠僞。爲國家謀長治久安之道，豈有率爾棄職而去之理？陳炯明於政府中爲內務總長，陸軍總長，至兵變時猶爲陸軍總長，果有請文下野之意，何妨建議，建議無效，與文脫離，猶將諒之。乃兵變以前，默無所言，事後始爲此說，其爲飾辭，肺肝如見。按當日事實：陳炯明於六月十五日已出次石龍，嗾使第二師於昏夜發難，槍擊不已，繼以發礮，繼以縱火，務使政府成爲煨燼，而置文於死地。蓋第二師士兵，皆爲湘籍，其所深疾，果使謀殺事成，卽將歸罪，以自掩其謀而兼去其患。乃文能出險，不如所期，始造爲請文下野之言。觀其於文在軍艦時所上手書，稱大總統如故，可證其欲蓋彌彰已。陳炯明以免職而修怨，葉舉等以飭回防地而謀生變耶？無論以怨望而謀不軌，爲法所不容，卽以事實言之，文於去年十月，率師次於桂林，屬陳炯明以後方接濟之任，陳炯明不惟斷絕接濟，且從而阻撓，文待至四月之杪，始不得已，改道出師；於陳炯明呈請辭職之時，猶念其前勞，不忍暴其罪狀，仍留陸軍

總長之任，慰勉有加，待之豈云過苛。葉舉等所部，已指定肇陽羅高雷欽廉梧州鬱州一帶，爲其防地，乃輒率所部，進駐省垣，騷擾萬狀，前敵軍心，因以搖動，飭之回防，詎云激變。可知凡此種種，亦非本懷，徒以平日處心積慮，惟知割據，以便私圖，於國事非其所恤，故始而阻撓義師，終而陰謀盤據，不惜倒行逆施，以求一逞，誠所謂苟患失之，無所不至者。且即使陳炯明之對於文，積不能平，至於倒戈，則所欲爲甘心者，文一人之生命而已，而人民何與？乃自六月十六日以後，縱兵淫掠，使廣州市會人民之生命財產，悉受蹂躪，至今不戢；且縱其凶鋒，及於北江各處，近省各縣，所至洗劫一空。人民何辜，遭此荼毒，言之痛心。向來不法軍隊，於攻城得地之後，爲暴於一時，已犯天下之大不韙，今則肆虐亘於兩月。護法以來，各省雖有因不幸而遭兵燹，未有如我廣東今日所處之酷者。北軍之加兵於西南，軍紀雖弛，有時猶識忌憚。龍濟光陸榮廷駐軍廣東，雖嘗以騷擾失民心，猶未敢公然縱掠，而此次變兵，則悍然爲之。聞其致此之由，以主謀者誘兵爲變時，兵忱於亂賊之名，憚不敢應，主謀者窘迫無術，乃以事成縱掠爲條件，兵始從之爲亂。似此煽揚凶德，汨沒人道，文偶聞野蠻部落，爲此等事，猶深惡而痛絕之不

圖爲此者，即出於同國之人，且出於所統率之軍隊，可勝憤慨！文夙以陳炯明久附同志，願爲國事馳驅，故以軍事全權付託。今者甘心作亂，縱兵殃民，一至於此，文之任用非人，誠不能辭國人之責備者也。此次兵變，主謀及諸從亂者所爲，不惟自絕於同國，且自絕於人類。爲國法計，固當誅此罪人，爲人道計，亦當去此蓋賊。凡有血氣，當羣起以攻，絕其根本，勿使滋蔓。否則流毒所播，效尤踵起，國事愈不可爲矣。以上所述，爲廣州兵變之始末。至於國事，則護法問題，當以合法國會，自由集會，行使職權，以達到目的。如此，則非常之局，自當收束，繼此以往，當爲民國謀長治久安之道。文於六月六日宣言中所陳工兵計畫，自信爲救時良藥；其他如國民經濟問題，則當發展實業，以厚民生，務使家給人足，俾得休養生息於競爭之世。如政治問題，則當尊重自治，以發舒民力。惟自治者，全國人民共有共治共享之謂，非軍閥假託自治之名，陰行割據，所得而藉口。凡此犖犖諸端，皆建國之最大方畧，文當竭其能力，以求貫徹。自維奔走革命三十餘年，創立民國，實所躬親，今當本此資格，以爲民國盡力。凡忠於民國者，則引爲友；不忠於民國者，則引爲敵。義之所在，并力赴之；危害非所顧，威力非所畏，務完成中華民國

之建設，俾國民皆受福利，責任始盡。耿耿此誠，惟國人共鑒之。」

六、陳炯明之失敗與中山先生之回粵

自北伐軍回師不利，中山先生離粵赴滬後，廣東全入陳炯明之手。陳氏自任粵軍總司令，以財政困難，欲以黃埔抵借大宗外款，各界羣起反對，海外華僑尤爲憤激，願輸捐餉，力請中山先生剷除陳氏。中山先生知民氣可用，乃令佔領閩邊之北伐軍許崇智、黃大偉、李福林等部，進剿潮、汕，令滇軍張開儒、楊希閔、朱培德、桂軍沈鴻英、劉震寰等部取道梧州入粵。旋滇軍攻佔梧州，連獲大勝，順流而下，收復封川、德慶。同時劉震寰率桂軍繞道抄出清遠、潛江，以拊肇慶之背。東路華僑討賊軍方瑞麟所部又克復龍門。陳炯明大驚，乃棄肇慶而退廣州。未幾，三水河口又爲滇桂軍佔領，陳氏乃率將領部衆退走東江。滇桂軍遂入廣州。

陳炯明既失敗，楊希閔、劉震寰等乃迎中山先生返粵，復任大元帥之職。中山先生決貫徹初志，繼續北伐，乃因東江陳部殘軍之掣肘，始終未獲成功。其後正式黨軍組織完成，消滅陳炯明之殘部，而楊希閔、劉震寰之叛變，亦被討平。廣東遂全入黨治勢力之下，而中國國民

黨之勢力，遂瀰漫於珠江流域矣。



第六章 護法非常國會時代之國民黨

六十五

第七章 中國國民黨之改組

一、俄國革命之影響

一九一七年俄國共產革命之成功，對於國民黨有極大之影響。俄國革命何以能奏如此捷速之成功？中國革命先於俄國，何以至今毫無結果？細加研究，則知俄國革命之成功，由於俄國共產黨之有嚴密之組織，有嚴格之紀律。中國革命之所以不能成功，以革命黨無良好之組織與嚴格之紀律也。蓋無良好之組織，則雖有一定之主義，亦不能實現。是故欲革命之成功，宜先嚴密黨之組織。中山先生乃派蔣介石等赴俄實地考察，研究共產黨之組織及赤衛軍之訓練，以為改組之準備。中山先生在桂林督師時，蘇俄派代表馬林來見；十一年，生派廖仲愷至日本與蘇俄代表會商，遂與蘇俄提攜。蘇俄共產黨之經驗，對於國民黨大有助也。

二、十二年一月一日之中國國民黨宣言

自中華革命黨解散以後，中山先生即有改組中國國民黨之意，以時機未至，故遷延而未實行。至民國十二年一月一日，乃發表中國國民黨宣言，實改組之先聲也。其辭曰：「中國之所以革命與革命之所以成功，原因雖繁，約而言之，不外歷史之遺留與時代之進化而已。蓋以言民族，有史以來，其始以一民族成一國家，其繼乃與他民族揉合搏聚以成一大民族，民族之種類愈多，國家之版圖亦隨以愈廣。以言民權，則民為邦本之義，深入於人心，四千餘年殘賊之獨夫，鮮能逃民衆之斧鉞。以言民生，則不患寡而患不均之說，由學理演為事實，求治者以摧抑豪強為能事，以杜絕兼併為盛德，貧富之隔，未甚懸殊，凡此三者，歷史之遺留，所以浸漬而繁滋者，至豐且厚，此吾人所以能自立於世界者也。然民族無平等之結合，民權無確立之制度，民生無均衡之組織，故革命戰爭，循環不已，盛衰起伏，視為固然，而未由觀長治久安之效。近世以來，革命思潮，磅礴於歐，漸漬於美，波蕩於東亞，所謂民族主義，民權主義，民生主義，乃由磨礪而愈進於光明，由增益而愈趨於完美，此世界所同而非一隅所能外者。我

國當此，亦不能不激勵奮發，於革命史上開一新紀元矣。本黨總理孫先生文，內審中國之情勢，外察世界之潮流，兼收衆長，益以新創，乃以三民主義爲立國之本原，五權憲法爲制度之綱領，俾民治臻於極軌，國基安於磐石，且以躋於有進而無退，一治而不復亂之域焉。夫革命之內容，既異於前代，革命之手段，亦因以不同。前代革命，雖起於民衆，及其成功，則取獨夫而代之，不復與民衆爲伍。今日革命，則立於民衆之地位，而爲之嚮導，所關切者民衆之利害，所發抒者民衆之情感。於民衆之未喻，則勞心焦思，瘖口曉音，以申徹之，且不恤排萬難，冒萬險，以身爲之先，及其既喻，則相與戮力，鏗而不舍，務斬於成而後已。故革命事業，由民衆發之，亦由民衆成之。本此宗旨，爰有興中會之組織。事出非常，頓遭挫折，繼以時勢之推移，人心之感動，志於革命者，乃如水之隨地而湧，於是更擴而爲同盟會。黨員徧於各省，而瀰漫於海外。主義之宣傳與實行，前仆後繼，枕藉相望，黨員之爲主義而流之血，殆足以滌盡赤縣之腥膻矣。清廷既覆，民國肇興，以爲破壞已終，建設方始，憲政實施，宜有政黨，故國民黨因以成立。中更癸丑之變，痛邦基未固，國難方殷，復有中華革命黨之組織。集合同志，努力與賣國稱帝者爲

敵及帝制既傾，革命之進行於以停止。既而武人毀法倡亂，國內洶洶，連兵數載，未獲寧息，同人感於主義之未貫徹，責任之無旁貸，乃更組織中國國民黨，以與全國人士共謀完成民國建設之大業，而期無負初衷焉。蓋吾黨名稱雖有因革，規則雖有損益，而主義則始終一貫，無或稍改。溯自中會以至於今，垂三十年，吾黨爲國致力，雖稍稍有所成就，而挫折亦至多。顧所成就者，爲主義之成就，而所挫折者，則非主義之挫折，特進行之偶然顛躓而已。民國以前，吾黨本主義以建立民國，民國以後，則本主義以捍衛民國。前此數年，爲民國與非民國之爭，最近數年，爲法與非法之爭。反對者所挾持之力，非不甚強，然卒於一蹶而不復振，蓋其所施爲者，違反國情，悖逆時勢，有以使然也。然亦惟反對者之梗阻與中立者之觀望，遂致民國之建設事業，進行遲滯，三民主義尙未能完全實現，五權憲法亦未得製定施行。此吾黨所爲旁皇不可終日者。撫已有之成效，既不敢不自勉，思現存之缺憾，又不敢不自奮，則惟有夙夜匪懈，前進不已，以求前後之成功已耳。所謂成功者，非一人一黨之謂，乃中華民國由陸危而鞏固而發揚光大之謂也。本黨同人爰據斯旨，依三民主權之原則，對國家設計畫及現所采

用之政策，謹依次陳述於國民之前：

一、前清專制，持其寧贈朋友不與家奴之政策，屢犧牲我民族之權利，與各國立不平等之條約。至今清廷雖覆，而我竟陷於列強殖民地之地位矣。故吾黨所持之民族主義，消極的爲除去民族間之不平等，積極的爲團結國內各民族完成一大中華民族。歐戰以還，民族自決之義日愈昌明，吾人當本此精神，內以促全民族之進化，外以謀世界民族之平等。其大要如左：

甲、勵行普及教育，增進全民族之文化。

乙、力圖改正條約，恢復我國國際上自由平等之地位。

二、現行代議制度，已成民權之弩末，階級選舉，易爲少數所操縱。欲踐民權之真義，爰有下列之主張：

甲、實行普選制度，廢除以資產爲標準之階級選舉。

乙、以人民集會或總投票之方式，直接行使創制複決罷免各權。

丙、確定人民有集會、結社、言論、出版、居住、信仰之絕對自由權。

三、歐美經濟之患在不均，不均則爭。中國患之在貧，貧則宜開發利源以富之。惟富而不均，則仍不免於爭。故思患預防，宜以歐美爲鑒，力謀社會經濟之均等發展，及關於社會經濟一切問題，同時圖適當之解決。其綱領如左：

甲、由國家規定土地法，使用土地法及地價稅法，在一定時期以後，私人之土地所有權，不得超過法定限度。私人所有土地，由地主估報價值於國家，國家就價征稅，並於必要時得依報價收買之。

乙、鐵路、鑛山、森林、水利及其他大規模之工商業，應屬於全民者，由國家設立機關經營管理之，並得由工人參與一部分之管理權。

丙、清查戶口，整理耕地，調正糧食之產銷，以謀民食之均足。

丁、改良幣制，以實貨爲交易之中準，並訂定稅法，整理國債，以保全國經濟之安寧。

戊、制定工人保護法，以改良勞動者之生活狀況，徐謀勞資間地位之平等。

己、確認婦女與男子地位之平等，並扶助其均等的發展。

庚、改良農村組織，增進農人生活，徐謀地主佃戶間地位之平等。

同人所計慮，尙不止於是者。右所陳述，特其佳略。其餘國家重大事項，將依本黨規程，就專任委員研究之結果，繼續就商於邦人君子。」

觀此宣言，可知國民黨之思想，已有極大之進步，三民主義至是始清楚詳密。以前所謂民族主義者，祇求脫離滿清之壓迫，今則民族主義運動之目的，在脫離一切帝國主義之壓迫，廢除一切不平等條約，并團結國內各民族以完成一大中華民族。如是，而民族主義之理論遂完成矣。以前所謂民權主義者，祇求政體上之改革，今則政府方面有五權憲法之規定，人民則於間接民權之外更有直接民權，即所謂選舉、創制、複決、罷免四民權是也。如是，而民權思想遂有具體的表現。以前所謂民生主義者，祇有平均地權之主張，後見中國資本主義亦漸發達，乃更加節制資本之主張，而民生主義之理論遂亦完成。次年中國國民黨第一次全國代表大會宣言及大會中所定之政綱，則又此具體的一貫思想之結晶也。

三、十三年一月之改組

民國十三年一月，中山先生召集全國及海外國民黨同志代表，在廣州開第一次大會，決定黨中總章，規定施行之政綱，容許中國共產黨黨員全體以個人名義加入。大會中又討論宣言書，經數次修改，始行決定。此宣言書為國民黨思想之結晶，在中國國民黨史上極關重要。宣言書首述中國之現狀，次指摘各派之錯誤曰：「自辛亥革命以後以迄於今，民國之情狀，不但無進步可言，且有江河日下之勢。軍閥之專橫，列強之侵蝕，日益加厲，今中國已入半殖民地之泥犁地獄，此全國人民所為疾首蹙額，而有識者所以徬徨日夜，急欲為全國人民求一生路者也。然所謂生路者果何如乎？國內各黨派以至於個人及外國人多有擬議及此者，試簡單歸納各種擬議以一評騭其當否而分述於下：

(一)曰立憲派。此派之擬議，以為今日中國之大患，在於無法，苟能藉憲法以謀統一，則分崩離析之局，庶可收拾。曾不思憲法之所以能有效力，全恃民衆之擁護。假使祇有白紙黑字之憲法，決不能保證民權，俾不受軍閥之摧殘。元年以來，嘗有約法矣。然專制餘孽，軍閥官

僚，僭竊擅權，無惡不作。此輩一日不去，憲法即一日不生效力，無異廢紙，何補民權。邇者曹錕以非法行賄，尸位北京，亦嘗藉所謂憲法以爲文飾之具矣。而其所爲，乃與憲法若風馬牛不相及。故知推行憲法之先決問題，首在民衆之能擁護憲法與否。舍本就末，無有是處。不特此也，民衆果無組織，雖有憲法，即民衆自身，亦不能運用之。縱無軍閥之摧殘，其爲具文自若也。故立憲派祇知要求憲法，而絕不顧及將何以擁護憲法，何以運用憲法，即可知其無組織無方法無勇氣，以真爲憲法而奮鬪。憲法之成立，唯在列強及軍閥之勢力顛覆之後耳。

(二)曰聯省自治派。此派之擬議，以爲造成中國今日之亂象，由於中央政府權力過重，故當分其權力於各省；各省自治已成，則中央政府權力日削，無所恃以爲惡也。曾不思今日北京政府之權力，初非法律所賦與，人民所承認，乃由大軍閥攘奪而得之。大軍閥既挾持其暴力，以把持中央政府，復即利用中央政府，以擴充其暴力。吾人不謀所以毀滅大軍閥之暴力，使不得挾持中央政府以爲惡，乃反欲藉各省小軍閥之力，以謀削滅中央政府之權能，是何爲耶？推其結果，不過分裂中國，使小軍閥各占一省，自謀利益，以與挾持中央政府之大軍

閱相安於無事而已，何自治之足云？夫真正的自治，誠爲至當，亦誠適合吾民族之需要與精神。然此等真正的自治，必待中國全體獨立之後，始能有成。中國全體尙未能獲得自由，而欲一部分先獲得自由，豈可能耶？故知爭回自治之運動，決不能與爭回民族獨立之運動分道而行。自由之中國以內，始能有自由之省。一省以內，所有經濟問題，政治問題，社會問題，惟有於全國之規模中始能解決。則各省真正自治之實現，必在全國國民革命勝利之後，亦已顯然，願國人一思之也。

(三)曰和平會議派。國內苦戰爭久矣，和平會議之說，應之而生，提倡而贊和之者，中國人有然，外國人亦有然。果能循此道而得和平，寧非國人之所望，無如其不可能也。何則？構成中國之戰禍者，實爲互相角立之軍閥。此互相角立之軍閥，各顧其利益，矛盾至於極端，已無調和之可能；即使可能，亦不過各軍閥間之利益得以調和而已，於民衆之利益固無與也。此僅軍閥之聯合，尙不得謂爲國家之統一也。民衆果何需於此乎？此等和平會議之結果，必無以異於歐戰議和所得之結果。列強利益相衝突，使歐洲各小國不得和平統一；中國之不能

統一，亦此數國之利益爲之梗也。至於知調和之不可能，而惟冀各派之勢力保持均衡，使不得衝突，以苟安於一時者，則更爲夢想。何則？蓋事實上不能禁軍閥之一派不得於他派施以攻擊；且凡屬軍閥，莫不擁有雇傭軍隊，則其結果，不得不出於戰爭，出於掠奪，蓋掠奪於鄰省，較之掠奪於本省爲尤易也。

(四)曰商人政府派。爲此說者，蓋鑒於今日之禍，由軍閥官僚所造成，故欲以資本家起而代之也。雖然，軍閥官僚所以爲民衆所惡者，以其不能代表民衆也。商人獨能代表民衆利益乎？此當知者一也。軍閥政府，託命於外人，而其惡益著，民衆惡之亦益深，商人政府若亦託命於外人，則亦一邱之貉而已。此所當知者二也。故吾人雖不反對商人政府，而吾人之要求，則在於全體平民自己組織政府，以代表全體平民之利益，不限於商界。且其政府必爲獨立的，不求助於外人，而惟恃全體平民自己之意力。

如上所述，足知各種擬議，雖或出於救國之誠意，然終爲空談，其甚者，則本無誠意而徒出於惡意的譏評而已。吾國民黨則夙以國民革命實行三民主義爲中國唯一生路。茲綜觀

中國之現狀，益知國民革命之不可緩。」

再次則解釋國民黨三民主義之真義，與十二年一月一日所發布之宣言末段無大異。謂民族主義之意義有兩方面，一在中國民族之自求解放，脫離帝國主義之壓迫與侵略。一在求中國境內各民族之一律平等，承認各民族之自決權，由各民族自由聯合而組織自由統一的中華民國。民權主義在使國民不但有選舉權，且兼有創制、複決、罷官諸權，而政府之組織，則以立法、司法、行政、考試、監察五權分立為原則。民生主義仍以平均地權與節制資本兩種主張同時施行。

宣言最後述國民黨之政綱曰：「吾人於政綱，固悉以求貫徹，願以道途之遠，工程之鉅，誠未敢謂咄嗟有成。而中國之現狀，危迫已甚，不能不立謀救濟。故吾人所以刻刻不忘者，尤在實行政綱，以為第一步之救濟方法。謹列舉具體的要求，作為政綱，凡中國以內，有能認國家利益高出於一人或一派之利益者，幸相與明辯而公行之。」

(甲) 總綱

(一) 國民政府，本革命之三民主義五權憲法以建設中華民國，其總統由國民選舉之。

(二) 建設之首要在民生，故對於全國人民之食、衣、住、行四大需要，政府當與人民協力，共謀農業之發展，以足民食，共謀織造之發展，以裕民衣，建築大計畫之各式屋舍，以樂民居，修治道路運河，以利民行。

(三) 其次為民權，故對人民之政治知識能力，政府當訓導之，以行使其選舉權，行使其罷官權，行使其創制權，行使其複決權。

(四) 其三為民族，故對於國內之弱小民族，政府當扶植之，使之能自決自治，對於國外之侵掠強權，政府當抵禦之，並同時修改各國條約，以恢復我國國際平等，國家獨立。

(乙) 對外政策

(一) 一切不平等條約，如外人租界地，領事裁判權，外人管理關稅權以及外國在中國境內行使一切政治的權力，皆當取消，重訂雙方互尊主權之條約。

(二) 凡自願放棄一切特權之國家及願廢止破壞中國主權之條約者，中國皆將認為最

惠國。

(三) 中國與列強所訂其他條約，有損中國之利益者，亦須重新審定，務以不害雙方主權為原則。

(四) 中國所借外債，當在使中國政治上實業上不受損失之範圍內保證並償還之。

(五) 庚子賠款，當完全劃作教育經費。

(六) 中國境內不負責任之政府，如賄選僭竊之北京政府，其所借外債，非以增進人民之幸福，乃為維持軍閥之地位，俾得行使賄選、侵吞、盜用。此等債款，中國人民不負償還之責任。

(七) 召集各省職業團體（銀行界商會）社會團體（教育機關等）組織會議，籌備償還外債之方法，以求脫離因頓於債務而陷於國際的半殖民地之地位。

(丙) 對內政策

(一) 關於中央及地方之權限，採均權主義。凡事務有全國一致之性質者，劃歸中央；有因

地制宜之性質者，劃歸地方；不偏於中央集權制或地方分權制。

(二) 各省人民得自定憲法，自舉省長，但省憲不得與國憲相抵觸。省長一方面為本省自治之監督，一方面受中央指揮以處理國家行政事務。

(三) 確定縣為自治單位。自治之縣，其人民有直接選舉及罷免官吏之權，有直接創制及複決法律之權。土地之稅收，地價之增益，公地之生產，山林川澤之息，礦產水力之利，皆為地方政府之所有，用以經營地方人民之事業及供應育幼、養老、濟貧、救災、衛生等各種公共之需要。各縣之天然富源及大規模之工商事業，本縣實力不能發展興辦者，國家當加以協助，其所獲純利，國家地方均之。各縣對於國家之負擔，當以歲入百分之幾為國家之收入，其限度不得少於百分之十，不得超過於百分之五十。

(四) 實行普通選舉制，廢除以資產為標準之階級選舉。

(五) 釐訂各種考試制度以救選舉制度之窮。

(六) 確定人民有集會、結社、言論、出版、居住、信仰之完全自由權。

(七) 將現時募兵制度，漸改爲徵兵制度，同時注意改善下級軍官及兵士之經濟狀況，並增進其法律地位，施行軍隊中之農業教育及職業教育，嚴定軍官之資格，改革任免軍官之方法。

(八) 嚴定田賦地稅之法定額，禁止一切額外徵收，如釐金等類，當一切廢絕之。

(九) 清查戶口，整理耕地，調正糧食之產銷，以謀民食之均足。

(十) 改良農村組織，增進農人生活。

(十一) 制定勞工法，改良勞動者之生活狀況，保障勞工團體，並扶助其發展。

(十二) 於法律上、經濟上、教育上、社會上，確認男女平等之原則，助進女權之發達。

(十三) 勵行教育普及，以全力發展兒童本位之教育，整理學制系統，增高教育經費，並保障其獨立。

(十四) 由國家規定土地法、土地使用法、土地徵收法及地價稅法。私人所有土地，由地主估價，呈報政府，國家就價征稅，並於必要時得依價收買之。

(十五)企業之有獨占的性質者及為私人之力所不能辦者，如鐵道航路等，當由國家經營管理之。

以上所舉細目，皆吾人所認為黨綱之最小限度，目前救濟中國之第一步方法。

(丁)施行方法

(一)建設之程序分為三期，一曰軍政時期，二曰訓政時期，三曰憲政時期。

(二)在軍政時期，一切制度，悉隸於軍政之下，而政府一面用兵力以掃除國內之障礙，一面宣傳主義，以開化全國之人心，而促進國家之統一。

(三)凡一省完全戡定之日，則為訓政開始之時，而軍政停止之日。在訓政時期，政府當派曾經訓練考試合格之員，到各縣協助人民籌備自治，其程度以全縣人口調查清楚，全縣土地測量完竣，全縣警衛辦理妥善，四境縱橫之道路修築完成，而其人民會受四權使用之訓練，而完畢其國民之義務，誓行革命之主義者，得選舉縣官，以執行一縣之政事，得選舉議員以議立一縣之法律，始成為一完全自治之縣。

(四) 凡一省全數之縣，皆達完全自治者，則為憲政開始時期，國民代表會得選舉省長，以為本省自治之監督。至於該省內之國家行政，則省長受中央之指揮。

(五) 在憲政開始時期，中央政府當完成設立五院，以試行五權政治，其序列如下：曰行政院，曰立法院，曰司法院，曰考試院，曰監察院。憲法草案，當本於政綱及訓政，憲政兩時期之成績，由立法院議訂，隨時宣傳於民衆，以備到時採擇施行。

(六) 全國有過半數省分，達至憲政開始時期，即全省之地方自治完全成立時期，則開國民大會，決定憲法而頒布之。憲法頒布之後，中央統治權則歸於國民大會行使，即國民大會對於政府官吏，有選舉權，有罷免權，對於中央法律，有創制權，有複決權。

(七) 憲法頒布之日，即為憲政告成之時，而全國國民，則依憲法施行全國大選舉，是為建國之大功告成。

四、改組後中國國民黨之組織

十三年一月全國代表大會通過中國國民黨總章後，散漫之國民黨，遂有極完善極有

系統之組織。中國國民黨之最高機關，爲全國代表大會，每年舉行一次，其職權如下：（一）接納及採行中央執行委員會及其他各部之報告；（二）修改本黨政綱及章程；（三）決定對於時事問題應取之政策與政略；（四）選舉中央執行委員候補執行委員與監察委員候補監察委員。在其閉會時期，則以中央執行委員會爲最高機關。中央執行委員會又分政治委員會軍事委員會與其他特種委員會之專事審核調查及研究者。

中央執行委員會之外，有中央監察委員會，稽核中央執行委員會財政之出入，審查黨務之進行情形及部員勤惰，訓令下級黨部審核財政與黨務，稽核在黨中央政府任職之黨員，其施政之方針及政績，是否根據本黨政綱及本黨制定之政策。

中央執行委員會組成中央黨部，內分組織、宣傳、工人、農人、商人、青年、婦女、海外軍人九部。組織部從事下級黨部之組織；宣傳部宣傳黨義與黨綱；工人部指導勞工運動；農人部指導農民運動；商人部指導商民運動；青年部指導學生及其他青年運動；婦女部指導婦女運動；軍人部指導軍隊中之黨務；海外部掌理海外擴張黨勢等事。

中央黨部之下，各省有省黨部，特別地方有特別地方黨部，重要都市有特別市黨部，此外縣有縣黨部，市有市黨部，區有區黨部，區黨部之下又有區分部，則國民黨之基礎機關也。此外特別機關中尚有特別黨部之組織，在祕密公開或半公開之非黨團體內尚有黨團之組織。茲列表於左：



此國民黨之組織系統也。至於國民黨與國民政府之關係，則可以下表明之：

表代部黨外海 表代部黨市別特 表代部黨省

會大表代國全

會員委行執央中

中央黨部

國民政府

(人九長部人八廿員委)

省黨部
特別地方黨部
特別市黨部

省政府
特別地方政府
特別市政府

縣黨部
市黨部

縣政府
市政府

觀上所述，可見改組後中國國民黨之組織，遠較未改組以前爲完備。自與中會以至中華革命黨時代，惟有黨員，而無民衆，黨員亦無嚴密管理之機關，管理民衆組織之機關更無論矣。改組以後，則大不然，凡黨員、農民、工人、商民、青年、婦女、軍人、僑民等皆有專設之機關管理指導，故可與民衆發生直接的關係，可領導民衆作政治奮鬥，以謀民衆自身之利益。以前奪取政權之事，專由黨員擔任，雖有時亦知利用民衆，然不知組織民衆。今則努力於民衆之組織，藉民衆之力量以奪取政權。簡言之，以前國民黨之策略，專注重政治運動與軍事運動，改組以後，則視民衆運動較政治軍事運動尤爲重要。且黨與政府之關係，亦至是而始形清楚詳密，政府至是而始完全受黨之指揮矣。

五、改組後宣傳之注重

改組以前，國民黨雖有宣傳，不過個人之文章、講演或行動而已，未有有系統之宣傳，亦未有大規模之宣傳。改組以後，則一變以前之態度，對於宣傳工作，較軍事運動政治運動尤爲注重。此乃國民黨之一大進步也。蓋欲革命成功，必須得民衆之援助，欲求民衆之援助，非

先使民衆明白黨之主義與政策不可。故革命之第一步，在於宣傳，在先得民衆之同情。國民黨領袖人物深知此理，故於改組以後，上自中央黨部下至區分部，皆專設宣傳一部，努力從事於宣傳。最近三四年國民黨勢力所以能有如此神速之進展者，雖原因甚多，而大半則宣傳之力也。

六、正式黨軍之養成

中國革命經數十年而不能成功者，其最大原因，在於無真正之革命黨軍。因無真正之黨軍，故每次革命，非藉臨時烏合之民軍，卽利用舊有之軍隊。烏合之民軍既無訓練，自無戰鬥力之可言，自不能戰勝敵軍；舊有之軍隊，本因一時之利益而投順，至時過境遷，復成革命軍之敵人。藉此種軍隊以革命，雖或幸得一時之勝利，終不能保持久遠。中山先生鑒於屢次革命之失敗，乃遣蔣介石赴俄考察赤衛軍之編練方法。十三年蔣氏歸國後，中山先生卽委任其爲黃埔陸軍軍官學校校長。此校後改中央軍事政治學校，對於校中學生，除專授以軍事之學理與實習以外，復授以政治上之知識。入校學生，須有中學畢業以上之程度，先定半

年畢業，後改一年。此校之目的，在養成具有革命精神，高尚志趣，健全身體及應有智能之革命軍陸軍軍官，以爲以後革命事業之中堅人材。此校畢業學生，既明白主義，甘爲主義而戰，甘爲主義犧牲，故皆驍勇絕倫。其後解散商團軍，驅逐陳炯明之殘部，擊破楊希閔之滇軍與劉震寰之桂軍。皆畢業是校軍士之力也。近更奮勇北伐，連戰連勝，江南諸省，悉被收復矣。



第八章 中山先生之北上與逝世

一、曹錕之賄選

自民國十一年第一次直奉戰爭以後，直派勢力大張，頗有即擁其首領曹錕爲總統之勢，徒以法統關係，不得不迎黎元洪復職，以爲過渡。至十二年六月，直派運動國會選舉曹錕爲總統之事，進行益急，乃以索餉爲名，驅黎元洪出京，並奪其大總統印，迫令宣告辭職。黎總統既被逼去職，曹錕乃與國會議長吳景濂等商議，謀以巨款收買議員，由吳景濂承認包辦選舉事宜，議員之選曹爲總統者，各以幣五千元爲酬，議員貪利，紛紛應諾。十月五日，大選期至，到場議員五百九十三人，選舉結果，曹錕竟以四百八十票當選爲大總統。事後衆議員邵瑞彭以賄選支票訴諸法庭，并以之刊諸報端，而曹錕賄選真相，遂爲國人所共知矣。

二、曹錕吳佩孚之覆滅

曹錕賄選告成，中山先生首先起而反對，時奉天之張作霖與浙江督軍盧永祥亦反對直派之舉動，乃與中山先生聯絡，而有所謂奉、浙、粵之三角同盟。十三年九月三日，直派之江蘇督軍齊燮元與浙盧正式開戰，直派之福建督軍孫傳芳率兵入浙，盧軍背腹受敵，遂潰敗。當江浙戰爭開始之時，廣東方面亦組織北伐軍，出發北伐，并刊布北伐宣言，「謂北伐之目的，不僅在覆滅曹吳，尤在曹吳覆滅之後，永無同樣繼起之人，以繼續反革命之惡勢力。」同時奉天方面亦為軍事之準備，分兵三路入關，曹錕吳佩孚以彭壽莘為第一軍總司令，王懷慶為第二軍總司令，馮玉祥為第三軍總司令，三路迎擊。

當直奉兩軍在山海關戰爭最激烈之際，直軍第三軍總司令馮玉祥與陝西陸軍第一師師長胡景翼，京畿警備副司令孫岳，熱河都統米振標等，忽於十月二十三日班師回京，屯兵於內外各城門及東西四牌樓，包圍中海南海，更駐重兵於新華門前，公府遂亦在包圍之中。馮等發布停戰主和之通電，要求曹錕頒停戰令，懲辦主戰人物及附和者，召集全國各省代表，共決時局問題。曹錕不得已，發布停戰之令，并下令免去吳佩孚本兼各職，撤消討逆總

副司令之名稱。馮玉祥則組織國民軍，自任總司令兼第一軍司令，胡景翼爲第二軍司令，孫岳爲第三軍司令，以備對吳作戰。并令黃郛組閣，逼曹下野，實行攝政，以維持中央之政局。

當馮軍回京之時，吳佩孚方在秦皇島督戰，聞訊，卽下令班師至天津，在天津設立臨時總司令部，自稱奉曹錕密電，囑其代行總統職權，下令討伐馮玉祥。俟因張馮兩軍聯合進攻，不易抵禦，而山東鄭士琦又宣告獨立，毀壞津浦鐵路，以阻長江下遊各省援吳之師，山西閻錫山亦助馮軍將京漢鐵路阻斷，使湖北援軍無法北上。吳佩孚至此，乃陷於絕境，知不可挽回，遂率幕僚由唐沽乘輪至南京，復由南京至武昌，擬組織護憲政府以對抗北方，因人民反對而罷，遂退居岳陽。

三、國民黨對於解決時局之主張

曹吳覆滅以後，時局之應如何解決，頓成一大問題，各方主張紛紛，莫衷一是，國民黨主張召集國民會議，集各團體之代表開會討論，以謀和平統一。故中山先生北上時發布對於時局之宣言云：「凡武力與帝國主義結合者無不敗；反之，與國民結合以速國民革命之進

行者無不勝。今日以後，當畫一國民革命之新時代，使武力與帝國主義結合之現象永絕跡於國內，其代之而興之現象，第一步使武力與國民相結合，第二步使武力為國民之武力。國民革命必於此時乃能告厥成功。今日者國民之外力固尙無可言，而武力與國民相接合，則端倪已見，吾人於此，不得不努力以期此結合之確實而有進步。

欲使武力與國民深相結合，其所有之途徑有二：

其一，使時局之發展能適應國民之需要。蓋必如是，然後時局發展之利益歸於國民，一掃從前各派勢力瓜分利益及壟斷權利之罪惡。

其二，使國民能自選擇其需要。蓋必如是，然後國民之需要乃得充分表現，一掃從前各派包攬把持隔絕羣衆之罪惡。

以上二者，為國民革命之新時代與舊時代之劃然鴻溝，蓋舊時代之武力為帝國主義所利用，新時代之武力則用以擁護國民利益而掃除其障礙者也。

本黨根據以上理論，對於時局主張召集國民會議，以謀中國之統一與建設。而在國民

會議召集以前，主張先召集一預備會議，決定國民會議之基礎條件及召集日期選舉方法等事。

預備會議以左列團體之代表組織之：

一、現代實業團體；二、商會；三、教育會；四、大學；五、各省學生聯合會；六、工會；七、農會；八、共同反對曹吳各軍；九、政黨。

以上各團體之代表，由各團體之機關派出之，人數宜少，以期得迅速召集。

國民會議之組織，其團體代表與預備會議同；惟其代表須由各團體之團員直接選舉，人數當較預備會議為多，全國各界皆得以同一方法選舉代表，以列席於國民會議。於會議以前，所有各省的政治犯完全赦免，並保障各地方之團體及人民有選舉之自由，有提出議案及宣傳討論之自由。

本黨致力國民革命，於今三十餘年。以今日國內之環境而論，本黨之主張，雖自信為救濟中國之良藥，然欲得國民之了解，亦大非易事。惟本黨深信國民自決，為民國革命之要道。

本黨所主張之國民會議實現以後，本黨將以第一次全國代表大會宣言所列舉之政綱，提出於國民會議，期得國民澈底的明瞭與贊助。

本黨於此，敢以熱誠告於國民曰：國民之命運，在於國民之自決。本黨若能得國民之援助，則中國之獨立自由，統一諸目的，必能依於奮鬥而完全達到。凡我國民，盍興乎來！

四、中山先生之北上與患病

中山先生爲謀中國之和平統一，并應國民軍馮玉祥、胡景翼、孫岳諸將領及一般國民之請，乃於十三年十一月十三日離粵北上，同行者二十餘人。十七日抵上海。十九日開一茶話會，招待上海新聞記者，宣布政見，說明此次北上之主張。在開國民會議，以解決國內人民生活計問題與廢除不平等條約兩大事。以上海直往天津一時查無船位，而北方歡迎代表又催促甚急，乃決定乘日船上海丸繞道日本赴津。二十一日離滬，二十三日至長崎，對歡迎之日本新聞記者及政學各界說明此次繞道日本之原因及對於中國政治之主張。二十四日抵神戶，在神戶候船五日，至三十日始乘北嶺丸起程往天津。十二月四日上午，船抵天津，各

界人士在碼頭歡迎者甚衆。旋即登岸坐汽車至日界張園。午後，往河北曹家花園拜訪張作霖，以答謝張之歡迎厚意。此次長途旅行，已覺勞頓，而由張園往返河北，經過長時間之寒冷氣候，遂受感冒，肝上亦覺痛苦，病勢若甚猛烈，乃靜居休養，延醫診治，經十餘日，感冒已愈，肝病亦緩和。

十二月十八日，段祺瑞派葉恭綽許世英二人歡迎先生從速晉京，並報告北京之近况，忽談及外交問題，先生方知段祺瑞已送公文於各公使，表示臨時執政必尊重歷年條約，乃頓受感觸，謂兩代表曰：「我在外面要廢除一切不平等條約，執政偏要尊重那一切不平等條約，是何道理？爾等要升官發財，怕那外國人，要尊重外國人，又何必來歡迎我呢？」經此震怒，肝病遂益爆發，全肝愈腫愈硬，且愈增苦痛，體溫雖與常人無異，惟脈搏則增多，有時每分鐘竟至一百二十以上。以天津無良好醫生，乃於三十一日扶病入京，寓北京飯店，請外國醫生六七人考察病症，均知爲肝病，惟究屬何種肝病，如何療法，則均不敢斷定，先生指定德國醫生克利負責診治，凡治肝病之藥方，試驗殆遍，均無效驗。時體溫升降尚不大，神思猶極

清楚。適段祺瑞謀召集善後會議，以對抗先生所主張之國民會議，而國民黨之是否加入善後會議，遂成一極大之問題。先生雖依醫生之囑咐，不見客，不談話，但仍時思應付時局之辦法。因段祺瑞措施乖謬，以軍閥土匪官僚帝制派復辟黨爲善後會議之分子，且預料將以忠於清室之趙爾巽爲議長，故先生決定國民黨不加入善後會議，而仍計畫開國民會議，以求和平統一之辦法。孰意十四年一月二十一日以後，先生病勢加重，體溫之升降甚大，時則升至攝氏表四十一度以上，時則降至二十七度以下。至二十四五日，則竟不能飲食矣。醫生咸主遷入醫院，施用手術，以救危急。二十六日，經先生家屬及國民黨同志之協商，得先生之允許，遷入協和醫院，施行解剖手術。解剖結果，知全肝已堅硬如木，全係肝癌，且已至末期，已屬無法可治，家屬及同志建議，改用中醫療治，先生知西醫已無辦法，故亦不十分拒絕，乃於二月十八日由協和醫院遷至鐵獅子胡同行轅，改用中醫療治，然亦未見功效。

五、中山先生之逝世

二月二十四日下午三時，有一看護婦表現極急忙之狀，出病房來報告中山先生家屬

及同志，謂先生喉中含痰極多，且神思又不十分清楚，恐已到極危險時期。國民黨同志知先生之病已絕望，故多主張預備一張遺囑，以備萬一危急時由先生簽字，作黨中永遠遵守之信條。衆推汪精衛預備此事。至是，聞看護婦言，汪君即約同家屬三人至先生榻前，面請先生指示數語，先生莊嚴而諭曰：「我沒有甚麼話要說。我的病如果是好了，有許多話說不完，我就搬到湯山去休養，化幾日的功夫，詳細的分別對你們說。我的病如果是不能好，還有什麼話可說呢？」言已目閉。汪君再行懇求，先生乃振目諭曰：「我看你們是很危險的呵！我如果是死了，敵人是一定要來軟化你們的。你們如果不被敵人軟化，敵人一定是要加害於你們的；你們如果要避去敵人的危險，就是一定要被人軟化。那麼我又有什麼話可說呢？」汪君乃以極誠懇之態度請求曰：「我們跟總理奮鬥過幾十年，向來都不曾怕過危險，向來沒有被敵人軟化過，以後還有甚敵人能殺軟化我等？不過總是要總理先告訴我等幾句話，令我等有所遵守，方知如何向前去奮鬥。」先生見請求如此懇切，乃重振目諭曰：「你們要我說什麼話呢？」汪君乃答曰：「我們現在預備好了幾句話，讀到總理聽，總理如果是贊成的，便

請總理簽個字，當作總理所說的話；總理如果是不贊成的，便請總理另外說幾句話，我可以代爲筆記下來，也是一樣。」先生聽至此，卽諭曰：「好呀！你們預備了什麼話呢？念到我聽罷。」汪君卽取一紙低聲慢讀曰：

「余致力國民革命凡四十年，其目的在求中國之自由平等。積四十年之經驗，深知欲達到此目的，必須喚起民衆及聯合世界上以平等待我之民族，共同奮鬥。現在革命尙未成功，凡我同志，務須依照余所著建國方略、建國大綱、三民主義及第一次全國代表大會宣言，繼續努力，以求貫徹。最近主張開國民會議及廢除不平等條約，尤須於最短時間，促其實現，是所至囑。」

先生聽畢後，表示極滿意之狀，點首曰：「好呀，我很贊成呀。」同時有一家屬繼續請求曰：「先生對於黨務，既是贊成這幾句話，對於家屬可不可以照這個樣子也說幾句話呢？」先生諭曰：「可以呀，你們要說甚麼話呢？」汪君乃取第二紙讀曰：

「余因盡瘁國事，不治家產，其所遺之書籍衣物住宅等，一切均付吾妻宋慶齡，以爲紀念。」

余之兒女已長成，能自立，望各自愛，以繼余志，此囑。」

先生聽畢後，又點首曰：「好呀，我也很贊成呀。」汪君更請求曰：「總理既是很贊成這兩張字，今日可不可以就簽個字，當作總理自己說的話一樣呢？」先生點首曰：「可以呀。」汪君乃開門出取筆墨。時宋夫人坐門外客堂中，見病室門啓，卽入。先生見夫人入，似欲免動。夫人對於病人絕望之感情，乃諭汪君曰：「今天不要簽字，過幾日再看罷。」汪君等祇得遵從先生之命，退出病室，俾先生得以休息。

二月二十四日以後，因先生體魄健，勇氣大，又延過十餘日。惟每日肝腫愈大，身體愈衰弱，飲食進身後，食物水分不能排洩，致身體浮腫亦日益增加。家屬與同志又請留學日本之山東王綸醫生用日本新發明治肺癰之藥水，每隔一日注射一次。注射至四五次後，先生覺頗有功效；嗣後又注射兩次，病人腹水仍有加無已。王醫生謂藥方雖然對症，但不能抵抗病勢，請求停止注射。至是，真所謂百藥罔效，諸醫束手矣。時已三月九日，先生除不能多進飲食外，體溫猶如常，惟脈搏則增加更多，有時竟至一百五六十次，呼吸極形減少，有時祇十八次。

然先生勇氣始終甚偉，態度仍極莊嚴，神思猶甚清楚，尙念念不忘東江軍事，同志告以勝利情形，先生似甚安慰，并諭曰：「要電告漢民，不可擾亂百姓。」至三月十一日正午以後，先生對各同志及家屬吩咐云：「現在要分別你們了。」更囑汪精衛到牀前諭云：「拿前幾日所預備那兩張字來呀，今日到簽字的時候了。」汪君乃將二紙呈上，由宋夫人含淚擡起先生手腕執鋼筆簽名。簽名以後，先生用極安靜之態度，召家屬環立左右，一一囑咐後事畢，諭各同志曰：「我這次放棄兩廣來北京，是謀和平統一的；我主張統一的方法，是開國民會議，實行三民主義五權憲法，建設一個新國家。現在爲病所累，不能痊愈，生死本不足惜，但是數十年爲國民革命所抱定的主義，不能完全實現，這是不能無遺憾的。我很希望各同志努力奮鬥，使國民會議早日開成，達到實行三民主義和五權憲法的目的，那麼我雖然是死了，也是很瞑目的。」自此以後，呼吸更形困難，精神疲倦，不能連續說四五字以上之語，只斷續反覆說「和平」、「奮鬥」、「救中國」數語。醫生以病人太辛苦，請勿言，好自安眠。自十一日下午安眠後，至晚六時半雖蘇醒一次，手足卽已變冷，不能多作言語。至十二日晨三時許更醒。

一次，即不能言語，祇喘氣不堪。延至九時三十分，先生便與一手創造之中華民國長辭矣！



第九章 中山先生逝世後之國民黨

一、兩廣之統一

中山先生離粵北上以後，以胡漢民任代理大元帥之職。時北伐軍猶在贛境作戰，陳炯明擬乘機聯合林虎、方本仁進攻廣州。胡代帥乃令粵軍總司令許崇智等進攻東江。許崇智調黃埔新軍四千餘人集合虎門，候令進攻，並委參謀長蔣介石爲總指揮。許蔣部兵士奮勇作戰，連獲大勝，陳炯明軍敗退，淡水、平山、海豐、陸豐、潮、汕等處先後被許蔣等部佔領。陳炯明後得林虎之援助，竭力反攻潮汕，又被許蔣部擊退，於是其根據地興寧、五華、梅縣等處，亦均喪失，陳乃率殘部退入閩邊。此次自十四年二月初旬開始戰爭，至三月底止，未及二月，竟將善戰之陳部將領洪兆麟、林虎等逐出潮梅之外，中外人士莫不驚服。從此國民黨之聲勢大振。

時高唱聯省自治之雲南唐繼堯，謀以兵力統一西南，乃令所部滇軍進攻桂邊，一面又聯絡在廣東之滇軍首領楊希閔，桂軍首領劉震寰，以圖合力推倒廣東政府，消滅國民黨。胡代帥竭全力以調停，冀和平解決，而楊劉反相逼日甚，遂毅然下令免建國軍滇軍總司令楊希閔、桂軍總司令劉震寰、桂軍第一軍軍長韋冠英等職，聽候查辦。胡代帥下免職令後，即準備討伐，將軍隊集中河南，與滇桂軍實行交戰，東江方面許蔣等部，回師援胡，西江方面李濟琛部亦開來助戰。楊劉等暮氣已深之軍隊，本無戰鬥力可言，故開戰不過數日，許蔣軍隊大部猶未及回抵廣州，已完全失敗，相繼出走，魏邦平率隊攻入省城。於是數年來盤踞粵省之滇桂軍閥，遂被驅逐，唐繼堯統一西南之迷夢，遂無由實現，國民黨乃轉危爲安。

十四年九月中旬，陳炯明系軍隊又乘東江空虛之時，由劉志陸主持發動，驅逐許崇智之軍隊，許部不戰而退，潮汕遂又爲陳軍所得，蔣介石率部往討，於十月十三日攻克素稱難攻之惠州。復向東進發，陳軍分三路迎擊，皆潰敗，即退出潮汕，其將領率殘部入閩。蔣介石乃委何應欽兼代潮汕善後督辦，並分兵進占閩邊之永定、平和兩縣。時南路李濟琛部已奉命

先後收復高雷，並渡海攻占瓊州，陳炯明系鄧本殷退守崖州。從此廣東全省遂完全統一矣。十四年初，廣西軍隊分沈鴻英與李宗仁黃紹維兩派。李黃軍本稱定桂軍，後改稱建國軍，服從大元帥命令。時沈鴻英頗欲獨霸廣西，設法消滅靖綏處督會辦李宗仁黃紹維之部。李黃乃聯合駐梧州之粵軍第一師師長李濟，與沈鴻英宣戰。沈軍分兩路向梧州進攻，李黃李等分頭迎擊，沈軍敗退，連失賀縣、平樂、柳州、桂林、全州等地，殘部退入湘粵邊境。廣西全省遂告統一。

時唐繼堯謀統一西南，率滇軍進攻廣西西部，李黃率部迎擊，粵方又調滇軍范石生部撤東江中左路之防，調赴梧州，協同李黃阻止唐軍由南寧東下，經李黃范諸軍竭力抵禦，唐軍不得逞，退回雲南。廣西全省復獲統一。

十五年二月下旬，廣州國民政府設立兩廣統一委員會，計畫兩廣軍事、政治、財政之統一辦法。至三月十五日，國民政府政治委員會通過兩廣統一委員會所提出之兩廣統一案，兩廣遂正式統一。該案內容共三項：（一）廣西政府受國民政府命令處理全省政務；（二）廣

西軍隊全部改編爲國民革命軍；(三)兩廣財政受國民政府指揮監督。六月一日，廣西依照兩廣統一委員會議決案正式組織省政府，一切均以國民政府所定之省政府組織法爲根據，推黃紹雄爲省政府主席。

二、北伐之成功

孫中山先生在世之日，數次出師北伐，以軍隊分子複雜，軍心團結不固，又受後方之牽制，致不克成功。中山先生逝世以後，兩廣先後統一，國民黨同志乃擬出師北伐，以遂先生之初志。國民政府軍事委員會任蔣介石爲國民革命軍總司令，掌任免所轄各軍長官及軍事機關黨代表并指揮軍略之大權。蔣氏於十五年七月九日正式就國民革命軍總司令之職。時湘省第四師長唐生智舉兵驅逐省長趙恆惕，趙部第三師長葉開鑫得吳佩孚之援助，率兵攻唐，唐敗退，派代表至粵見蔣總司令，表示輸誠，蔣即委唐生智爲國民革命軍第八軍軍長兼前敵總指揮，率湘軍由湘進攻湖北，並調第四軍陳銘樞，張發奎部第七軍李宗仁部往援。激戰數日，葉軍潰敗，長沙遂爲革命軍所得。

蔣介石以軍事勝利，急應出發前方指揮，乘勝進攻，乃令粵方革命軍大隊趕赴前線，已亦於七月二十六日由韶關轉道入衡，旋即下總攻擊令，第四、第七、第八各軍奮勇作戰，連克平江、汨羅、岳州等地，乘勝攻占通城、羊樓峒、蒲圻、汀泗橋、咸寧、賀勝橋。賀勝橋克復以後，革命軍更探急進戰略，經官埠橋、紙坊市而直達武昌。以武昌有陳嘉謨、劉玉春二部之堅守，進攻不已，乃改變戰略，決先收復漢陽、漢口。攻漢陽之軍，以得劉佐龍部之內應，故未受若何之犧牲，即將漢陽完全占領。吳佩孚知大勢已去，恐被革命軍包圍，乃將漢口放棄，革命軍跟蹤追擊，連克祁家灣、孝感、廣水而直達武勝關。吳佩孚率殘部退入豫境。其後陳劉二部困守之武昌，亦被革命軍攻破，陳劉二人皆被擒。

湘鄂克復以後，蘇浙皖閩贛五省聯軍總司令孫傳芳、陳兵、韓邊，頗有攻取長沙截斷革命軍後路之意。蔣介石乃率革命軍自長沙直趨江西萍鄉，在萍鄉設立大本營，正式與孫傳芳軍開戰。兩軍戰鬪甚烈，南昌為革命軍得而復失者數次。後革命軍之一部，由湖北陽新潛入贛境，於十一月一日占領南潯鐵路之馬迴嶺車站，猛向九江進攻，於四日逼近九江車站。

九江孫軍紛乘民船向下流潰退，九江遂爲革命軍占領。九江既失，南潯路一帶之孫軍，望風奔逃，紛退蘇皖。江西全省遂被革命軍收復。

時東路革命軍自粵東出發，已將福建全省收復，乃會同江西之革命軍進攻浙江，不一月而浙江全省已被克復。浙江既下，革命軍乃分四路進取江蘇，時孫傳芳部已陸續退駐江北，滬寧一帶，歸魯軍布防。革命軍第一路由嘉興沿滬杭路，直撲上海，第二路由湖州，襲擊吳江，第三路由長興進攻宜興，會師蘇常以攻南京，第四路則由皖南直搗南京。開戰以後，四路皆捷，滬寧一帶，皆被革命軍占領，魯軍潰退，江南遂完全底定。

東南大定以後，革命軍仍繼續北伐。漢口方面之革命軍，出武勝關而北進，與奉軍激戰於豫境，奉軍大敗，退往黃河以北，黃河以南鄭州開封等地悉被革命軍占領。南京方面之革命軍，亦分兩路北伐，一路由揚州進擊江北孫傳芳之殘部，一路沿津浦線猛攻魯軍，不及旬日，東路已達清江、海州、津浦正面已克徐州，近且大軍更深入魯境矣。

三、國民政府之成立與第二次代表大會之召集

自兩廣統一以後，代帥胡漢民即發表改組國民政府之宣言。至十四年七月一日，國民政府正式成立，採合議制，以汪精衛、胡漢民、孫科、許崇智、伍朝樞、徐謙、張繼、譚延闓、戴季陶、林森、張靜江、程潛、廖仲愷、古應芬、朱培德、于右任等十六人爲委員，主持政務，並推汪精衛爲委員長，許崇智爲軍事部長，胡漢民爲外交部長，廖仲愷爲財政部長。此國民政府爲真正與人民合作之政府，國民黨將憑此政府以實現其政綱政策。迨後北伐勝利，湘鄂克復，國民政府乃由廣州移至武漢。最近以武漢國民政府被共產黨把持，於是南京乃有新政府之設立。

民國十五年一月，國民黨召開全國第二次代表大會於廣州，討論進行方法。大會發布一極長之宣言，重行確定第一次大會宣言之主旨，仍以第一次大會宣言對於三民主義之解釋及最少限度之政綱爲中國之唯一生路，故對於主義準備繼續努力，以求貫徹，對於政綱亦無所修改，惟期其得見諸實行。宣言首述世界之現狀，以明世界各被壓迫民族已開始覺悟其所處之地位，起爲民族革命之運動。次述中國之現狀，指出帝國主義之走狗軍閥、官僚、買辦階級、土豪等之惡行，故中國之生路，對外當打倒帝國主義，以聯合世界革命之先進

國，聯合世界上一切被壓迫民族，聯合帝國主義者本國內大多數被壓迫之人民，爲必要之手段；對內當打倒軍閥、官僚、買辦、土豪等一切帝國主義之工具，以造成人民的軍隊，造成廉潔的政府，提倡保護國內新興工業，保障農工團體，扶助其發展，爲必要之手段。再次述國民黨努力之經過，最後則總結宣言全部之大旨。

四、黨內之糾紛

民國十三年一月國民黨容納共產黨員加入以後，國民黨內遂有共產派與非共產派之分。中山先生逝世以後，兩派之爭鬪益烈。非共產派見共產派聲勢日大，乃於十四年十二月開中央執行委員會於北京西山，議決開除共產黨員在國民黨內之黨籍。廣州方面以西山會議不足法定人數，不予承認，共產派聲勢乃益大。然自十五年三月二十日中山繼事件發生以後，廣州方面之國民黨員對共產黨亦嚴加防範，於是乃有五月十七日中央執行委員會之決議。惟當北伐順利，江南諸省先後克復之時，共產黨活動益烈，且有不利國民黨之謀，國民黨員不能復忍，乃有中央監察委員吳稚暉之舉發共產黨謀叛呈文，於是寧漢乃先

末。後有清黨之運動。此排共運動在國民黨史上有重大之意義，故當另立一章，詳細敘述其始



第十章 排共運動

一、中國共產黨

中國之共產主義團體有二：一曰中國共產黨，一曰中國共產主義青年團。五四運動以後，國內之一部分青年，即有社會主義青年團之組織，與俄國共產黨時通聲息。此社會主義青年團，後改名為中國共產主義青年團，作為第三國際少年共產黨之一支部。中國共產黨之正式組織，在民國九年。十年在上海舉行第一次全國代表大會，議決加入第三國際，派遣代表，出席莫斯科國際第三次大會，公認為第三國際之支部。第三國際黨成立於一九一九年，為蘇俄首領列寧所手創，故共產黨少年共產黨之本部，皆設於俄京莫斯科。少年共產黨須受共產黨之指揮，不能直接與開國政。中國共產主義青年團亦然，於政治上全遵中國共產黨之指導，故可謂為中國共產黨之支部。中國共產黨之宣傳機關，有新青年、嚮導、前鋒、中

國青年諸雜誌。主張階級鬭爭，無產階級專政，打倒帝國主義與資本主義，直接行動，一切經濟皆歸公有。中國支部以陳獨秀、李大釗、譚平山等為主要人物。

二、中國國民黨之改組與共產黨員之加入

民國十三年中國國民黨之改組，本有拋棄普通政黨政策重行建設革命方針之意，且欲改變以前之專重軍事政治政策，轉而注意民衆之團結。共產黨頗與此旨相合，且同屬革命的黨，故有容納共產黨員加入國民黨之勢。國民黨第一次全國代表大會開會之時，中山先生提出容納共產黨員加入國民黨一案，經大多數代表贊成通過。當時即有馮自由等提出反對。中山先生以共產黨員無條件屈服國民黨，願遵奉國民黨之三民主義，故不聽反對派之諫止。

然共產黨之主張與手段，究與國民黨不同。共產黨主張階級鬭爭，無產階級專政，廢除私有財產制度，與國民黨之主張全民革命，節制資本，平均地權有異。兩黨之合作，本為難能之事，而欲共產黨拋棄其主張，完全服從國民黨之主張與政策，亦絕對不能辦到也。共產黨

之所以願加入國民黨者，以己黨勢力未厚，多數國人猶怕聞「共產」二字，不能作公開之宣傳，故欲借國民黨之名義，暗中宣傳己黨之主義，漸次擴張其勢力，非真肯解散己黨，拋棄己黨之主張與手段，以奉行國民黨之三民主義也。故共產黨員加入國民黨以後，共產黨之幹部組織，依然獨立，直接隸屬於莫斯科之第三國際，不受國民黨黨義之拘束。

三、西山會議與排共運動之勃興

自中山先生逝世以後，國民黨與共產黨暗鬪漸烈。十四年八月，國民黨中央執行委員國民政府財政部長廖仲愷被人刺死，偵查結果，知係恨廖氏偏護共產黨之一部分國民黨員所為。蔣介石以正統派之態度，解散刺廖主謀者之軍隊，反共派遂相率離粵。是時以後，黨內共產派聲勢日見增高。

一部分國民黨中央執行委員會委員，見共產派氣勢日高，急謀抵制之法，遂於十四年十一月二十三日在北京西山中山先生靈前，開中央執行委員會全體會議，通過取消政治委員會，取消共產黨員在國民黨之黨籍，政治顧問鮑羅庭解雇，中央執行委員會移滬等決

議並電汪精衛譚延闓及各級黨部曰：「森等在京集會，實因共產派違反總理允許其歸化之至意，公然役於強俄，乘喪謀我，蟠踞中樞，結託狂少，放逐展堂，迫走慧生，中央幹部，失去自由，此不能不移地開會之最大理由。北京爲政治中心，軍閥官僚，踞爲巢窟，本黨責在政治革命，縱幽入穴，豈避危險？且政局變動，民衆亟待指導，此大會應在北京開會之最大理由。今中央第四次全體會議，已在總理靈前開會，決議取消共產派在本黨之黨籍及解雇鮑羅庭一切職務，修正第二次全國代表大會選舉法，並接洽指導民衆。務請同志念吾黨締造之艱，責任之重，一致努力，是所至禱。至反動分子，自當竭我赤誠，納諸軌物，若自外主義的革命意義，當然爲黨之所不容，紀律俱在，自當執行。」署名者爲林森、居正、石青陽、覃振、沈定一、鄒魯、葉楚傖、戴傳賢、石瑛、邵元冲、張繼、謝持、茅祖權、張知本、傅汝霖等十五人。

林森等以共產黨加入國民黨後，在主義上只作以階級鬭爭爲中心之宣傳工作，在農工運動方面設種種方法阻止非共產派國民黨員之參加，在組織方面則利用國民黨之軀幹以發展共產黨之勢力，不受國民黨之管理，仍聽共產黨機關之指揮，故決定取消共產黨

議並電汪精衛譚延闓及各級黨部曰：「森等在京集會，實因共產派違反總理允許其歸化之至意，公然役於強俄，乘喪謀我，蟠踞中樞，結託狂少，放逐展堂，迫走慧生，中央幹部，失去自由，此不能不移地開會之最大理由。北京爲政治中心，軍閥官僚，踞爲巢窟，本黨責在政治革命，縫幽入穴，豈避危險？且政局變動，民衆亟待指導，此大會應在北京開會之最大理由。今中央第四次全體會議，已在總理靈前開會，決議取消共產派在本黨之黨籍及解雇鮑羅庭一切職務，修正第二次全國代表大會選舉法，並接洽指導民衆。務請同志念吾黨締造之艱，責任之重，一致努力，是所至禱。至反動分子，自當竭我赤誠，納諸軌物，若自外主義的革命意義，當然爲黨之所不容，紀律俱在，自當執行。」署名者爲林森、居正、石青陽、覃振、沈定一、鄒魯、葉楚傖、戴傳賢、石瑛、邵元冲、張繼、謝持、茅祖權、張知本、傅汝霖等十五人。

林森等以共產黨加入國民黨後，在主義上只作以階級鬭爭爲中心之宣傳工作，在農工運動方面設種種方法阻止非共產派國民黨員之參加，在組織方面則利用國民黨之軀幹以發展共產黨之勢力，不受國民黨之管理，仍聽共產黨機關之指揮，故決定取消共產黨

員在國民黨之黨籍。國民黨以孫中山先生所創之三民主義爲主義，黨員之行動與言論，須合於先生之主義與遺教，共產分子加入國民黨後，其言論行動如有不合黨之標準，不受黨之約束者，自當予以制裁。此次在西山所開之中央執行委員會全體會議，根據議決案開除中央執行委員譚平山、李大釗、于樹德、林祖涵，候補執行委員毛澤東、瞿白秋、韓麟符、于方舟、張國燾等黨籍。并以汪精衛違反中山先生容納共產黨員歸化國民黨之本意，對於顧問俄人鮑羅廷及共產黨，未能加以制裁，應開除黨籍六個月，在六個月以內，不得在國民黨執政地方之政府機關服務。

西山會議之決議，不能實行，廣州方面，以其不足法定人數，不加採納，於是戴傳賢、張繼、葉楚傖、邵元冲、沈定一、林森、鄒魯、覃振、茅祖權、居正、張知本、石青陽等在上海設立國民黨中央執行委員會，以爲抵制。而反對改組之馮自由、馬君武等，則在北京組織國民黨同志俱樂部，傅汝霖等又在北京組織孫文主義學會，設支部於各地，專以闡明孫文主義之真義及排斥共產主義爲目的。

廣州國民黨非共產派要人，雖未採納西山會議之決議，而對於共產黨之活動，則亦嚴加防範。時黃埔中央軍事政治學校，亦有共產主義青年團派與孫文主義學會派之爭，迨中山艦事件發生，兩派之爭執更烈，蔣介石仍以正統派之態度，解散校內之兩團體。汪精衛以病請假，離開廣州。是後國民黨對於共產黨益加戒備。十五年五月十七日，中央執行委員會開會，嚴定國民黨與共產黨之關係，以鞏固黨之組織。其議決要項如下：

(一) 他黨黨員加入本黨，對於孫總理及三民主義不得懷疑或加批評。

(二) 他黨黨員加入本黨，任為高級黨部（中央黨部，省黨部，特別市黨部）執行委員時，不得超過各該黨部執行委員總數三分之一。

(三) 他黨黨員加入本黨，不得任為本黨中央機關之部長。

(四) 凡隸國民黨黨籍者，未得最高級黨部之許可，不得另有政治關係之組織及行動。

四、調解之失敗

自北伐勝利兩湖江西先後克復以後，共產黨員活動更烈，黨勢更大，宣傳共產主義亦

愈甚，且有壓迫排擠真正國民黨員之勢。真正國民黨員甚爲憤激，排共之進行亦遂愈甚。十六年三月，蔣介石在南昌總部有激烈之演說，謂「現在共產黨黨員，事實上有許多對國民黨黨員加一種壓迫，表示一種強橫的態度，並且有排擠國民黨員的趨向，使得國民黨黨員難堪。這樣，我便不能夠照從前一樣的優待共產黨了。我是國民革命的領袖，並不僅是國民黨一黨的領袖，共產黨是中國革命之一部分，所以共產黨員有不對的地方，有強橫的行動，我有制裁的責任及權力。」然國民黨領袖方面雖有此種表示，共產黨並不稍讓，把持武漢國民政府，積極進行。迫滬寧克復以後，竟有不利於國民黨及國民革命之謀，於是真正國民黨員更不能忍矣。

兩派之爭執，既日趨猛烈，大有旦夕將決裂之勢。各黨部及政府要人，皆電促汪精衛回國，頗冀其妥爲調解，以和平解決。汪氏以十六年四月三日抵滬。執意抵滬後二日，即與共產黨領袖陳獨秀聯銜發布下列宣言：

「國民黨共產黨同志們：此時我們的國民革命，雖然得到了勝利，我們的敵人，不但仍

然大部分存在，並且還正在那裏伺察我們的弱點，想乘機進攻，推翻我們的勝利。所以我們的團結，是時更非常必要。

中國共產黨堅決的承認中國國民黨及國民黨的三民主義在中國革命中毫無疑義的需要；只有不願意中國革命向前進展的人，纔想打倒國民黨，纔想打倒三民主義。中國共產黨無論如何錯誤，也不至於主張打倒自己的友黨，主張打倒我們敵人（帝國主義與軍閥）素所反對之三民主義的國民黨。使敵人稱快。

無產階級獨裁制，本是各國共產黨最大限度的政綱之一，在俄國雖然實現了。照殖民地半殖民地政治經濟的環境，是否要一定死板的經過同樣形式的同樣階級，還是一個問題；何況依中國國民革命發展之趨勢，現在固然不產生這樣問題，即將來也會不至發生。中國所需要的，是建立一個各被壓迫階級的民主獨裁來對付反革命，不是什麼無產階級獨裁。兩黨合作本有各種不同的形式，重要之點是在兩黨大多數黨員羣衆雙方以善意的態度解決此問題，方不違背合作之根本精神。

中國國民黨多數同志，凡是瞭知中國共產黨的革命理論及其對於中國國民黨真實態度的人，都不會懷疑孫總理的聯共政策。現在國民革命發展到帝國主義的最後根據地上海，驚醒了國內外一切反革命者，造謠中傷離間，無所不用其極。甲則曰共產黨將組織工人政府，將衝入租界，貽害北伐軍，將打倒國民黨。乙則曰國民黨領袖將驅逐共產黨，將壓迫工會與糾察隊，這類謠言，不審自何而起。國民黨最高黨部最近全體會議議決，已昭示全世界，決無有驅逐友黨摧殘工會之事。上海軍事當局表示服從中央，即或有些意見與誤會，亦未必終不可解釋。在共產黨方面，愛護地方安寧秩序，未必敢後於他人，對於國民政府不以武力收回上海租界政策，亦表贊同，總工會亦已發表不單獨衝入租界之宣言，對於市政府亦贊同各階級合作政策，事實俱在，更無造謠之餘地。

國共兩黨同志們：我們強大的敵人，不但想以武力對待我們，並且想以流言離間我們，以達其「以赤制赤」之計。我們應該站在革命的觀點上，立即拋棄相互間的懷疑，不聽信任何謠言，相互尊敬，事事開誠協商進行。政見即不盡同，根本必須一致。兩黨同志果能開誠

合作，如弟兄般親密，反間之言，自不獲乘機而入也。披瀝陳詞，萬希各自省察，勿至爲親者所悲，仇者所快，則中國革命幸甚！兩黨幸甚！

此宣言中中國共產黨稱國民黨爲友黨，以共產黨與國民黨並立，不復承認其以前加入國民黨之事，不復承認其爲國民黨之一部分，且頗有以共產黨爲主，國民黨爲賓之意，故國民黨之忠實黨員，對此宣言，大不滿意。同日國民黨要人開談話時，吳稚暉即責問汪精衛曰：「因今日報紙登載國民黨共產黨兩首領之宣言，外間誤會者甚多，以爲從此中國歸兩黨共同治理，信有之乎？」汪氏曰：「那讀者太不辨文理了，全部宣言僅言兩黨之誤會不可發生，未言兩黨共理中國，能許在報上發表麼？」汪氏坦然允許。吳氏又補充數語曰：「總理臨歿，致蘇俄遺書，有「我希望國民黨在完成其由帝國主義制度解放中國命運，使我必須放下我未竟之業，移交於彼謹守國民黨主義與教訓而組織我真正同志之人。」照此看來，我們國民黨黨員，止有老實不客氣說，治理中國，止有國民黨，沒有聯了共產黨來共治之可能。於又一方面，於

總理的聯俄政策及友視不入國民黨之共產黨，皆無抵觸。聯俄政策，即遺書所謂「予我國之援助」，自然不是請他共治中國。至於容納共產黨，乃是叫共產黨內的個人來服從國民黨主義，他便是國民黨。至於友視不入國民黨之共產黨，充其量也與所聯之俄國一樣，請他們予我黨助力，不是請他共治中國，更不是一定容許他們來鼓吹共產主義，止容許他們相當的研究。然若有抵觸國民黨或竟危害國民黨者，執總理囑咐我們「謹守國民黨主義與教訓」之旨，我們定可有相當之抵止。

四月五日以後，國民黨要人以中央黨部及國民政府被人把持，所有漢口之命令，上海及各地之行動，均極顛倒離奇，故迭開談話會，討論應付之法。最後乃共依汪精衛之主張，暫時容忍，於四月十五日召集中央全體執行監察委員聯席會議於南京，以求和平解決。不久汪精衛離滬赴漢，欲邀武漢方面之執監委員來寧開會，終以他故未能如願，於是和平解決無望，監察委員吳稚暉遂呈舉發共產黨謀叛之文於中央監察委員會，中央監察委員會遂咨文中央執行委員會，請以非常緊急處置，將共產黨首要危險分子，分別看管監視，免予活

動。

五、吳稚暉舉發共產黨之謀叛

中央監察委員吳稚暉爲舉發共產黨謀叛呈中央監察委員會文曰：「中國國民黨中央監察委員會公鑒：竊總理於前年改組國民黨，容納共產分子，當時加入國民黨之共產黨員李大釗，亦曾聲明，此等黨員止以各個人之資格，服從國民黨主義，並非國民黨與整個共產黨合作。今者共產黨有謀叛之準備，遂喧騰其聯共之口號，誣譏總理，挾制輿論，以圖大逞。按總理容納共產分子，有兩層用意：（一）總理於學說向主自由研究，共產黨若無背叛中國與國民黨行爲，僅研究學說者，可與研究任何並無背叛行爲之學說一同聽其研究。（二）因總理知共產必不適宜於中國，尤其是階級鬭爭之共產主義，故自創三民主義，以適合中國，且允許共產黨分子之有覺悟者服從國民黨主義，使之陰銷其逆謀。不料自共產黨分子加入國民黨後，共產黨積漸謀逆。迨總理逝世，尤逐步日肆陰謀。本黨乃忍痛疊予以最大之庇護，且瘡口以致其多方之忠告，終望得遂總瑣銷其逆謀之願。而不料終究適予以得步進步

之披猖，遂使帝國主義之國家及國內軍閥謀傾本黨者，借赤化爲口實，淆亂世界之衆聽。北伐軍興以來之所到之地，皆有黨軍可愛黨人可殺之怨聲。去年國慶後，本委員接得漢口寄來中國共產黨湖北區執行委員會及中國共產主義青年團湖北區執行委員會雙十節敬告同志宣言，請本委員以監察員資格，有所注意，或加以彈劾，以止叛亂。本委員因諸如此類之叛逆印物，近年以來，時有發見，非密加訪察，得其真相，不欲輕爲口舌之爭。蓋彼輩兇狡無賴，若不到澈底解決之時期，彼輩必誣爲老朽昏庸，思想落後，反動分子，反革命派等標語，極其恫恍迷離，吠影吠聲，函電紛紜，詈罵交闕，使成獸鬪泥中之形，以丐其虎據要津之助。（如俄人鮑羅庭之類。）一聲不中，更張其鱗。近半年中，本委員以中央所派江蘇特務委員會委員，隨鈕委員永建之後，同在上海注意時局，乃爲若輩包圍，離奇逆跡，隨在呈露。鈕委員焦頭爛額，痛苦逾常，窮於應付，迫而謝病。本委員於本年三月六日晚間八時，偕同鈕委員及上海特別市黨部執行委員楊委員銓，晤見中國共產黨首領陳獨秀中國共產黨上海首領羅亦農於上海環龍路二十六號鈕委員辦公處，談話甚多。其要點，本委員告陳首領「研究共產

學說，自爲共產黨之責，若實行共產，五六年前蘇俄代表越飛在廣州語孫總理，當在二百年之後。以我理想，二百年尙嫌不足。」陳首領笑我太迂，我言「急切輕掛招牌，止是贗鼎。」陳說「你更瘋顛。請問中國現在的共和不是僞的嗎？但你以爲康有爲之復辟與僞共和孰優？」本委員遂知中國共產黨欲實行僞共產，意在言外，因突然根問，問陳首領「你想中國實行列寧式共產主義是若干年。」彼不遲疑而答曰：「二十年。」余作駭極之情狀，隨即將陳首領所定二十年中國可實行列寧式共產主義一語，請楊委員於隔座特別注意。時羅首領似怪陳首領直率，合座默然。本委員卽亂以閒話曰：「如此，國民黨生命止贍十九年了。前時總理答越飛國民黨國民革命完成應需三十年，若你們共產黨急迫至此，未免取得國民黨的生命太快了一點，應當通融商量纔好。」因共強笑而罷。本委員自親在中國共產黨首領陳獨秀口中得到二十年中國實行列寧式共產主義一語，乃核以去年雙十節湖北共產黨敬告同志宣言，其扼要之言曰：

「雙十節本當慶賀，而無慶賀之價值……因爲內部奸賊，仍未澈底剷除。那裏趕得上

蘇俄革命紀念日值得我們真誠的慶賀啊！

同志們，無產階級人們：我們最近決議案，是有辦法的，是有步驟的，祇須放大膽量，祕密進行，圖我們的新生命，自有剷除奸賊真正成功之一日，那真值得熱烈的慶賀！

我們的步驟就是：

(一) 第一步，我們老實不客氣的說，我們現在勢力未充，應該利用別人想做新軍閥的心理機會，貌合神離的幫助他，以打倒原來一般的舊軍閥。

本委員案：如此，蔣中正、馮玉祥、唐生智暨各軍界同志，都是共產黨貓腳爪。他們拿住了，向火裏去取燬栗子。不過他們把打倒舊軍閥，便算是想做新軍閥，乃非常可怪的奇議論。因此從前共產黨反對北伐，又增了一個用意的旁證。所以近來借抑新軍閥的外面，在漢口挾着中央黨部國民政府，行他們搗亂北伐的內面，都是他們預定的計畫。

(二) 第二步，我們根據最近決議的精神，以黨團監督政治以政治監督軍事方案，切實督責想做新軍閥的人。倘還要難為我們，那就用快刀斬亂麻的手段，痛痛快快的來解決。

他，以求最後的澈底吧。」

本委員案：亂麻指國民黨，快刀必指無產階級人們的血肉。這種無產階級人們，又是他們的貓腳爪。請大家注意，開首喚起語中所謂同志們，無產階級人們，同志與非同志，多麼分得清楚啊！他們必還定有秘密文件，也得云：「我們老實不客氣的，說我們現在勢力未充，應該利用別人想做無產階級的心理機會，貌合神離的幫助他，以打倒想做新軍閥的國民黨。」他們借乙打甲，借丙打乙，借丁打丙。抽繭剝蕉的方法，已施於國民黨者，可以完全證實。他們不認無產階級人們爲同志，足見工呀農呀，都是他們的貓腳爪，最後打盡了中國大部分人，止贖他們的同志，就實現清一色的共產世界。所以現在擁汪倒蔣，過些時，又必擁鮑倒汪，再過些時，又必擁列寧倒孫文，罵孫文思想不澈底，送他照相到歷史博物館。規矩規矩是二十年，痛痛快快快起來，二年二個月，止有機會。但他們種種喪失信用的利用別人，他們終有給人覺悟的機會。蘇俄的陰謀，施諸土耳其而無效，還要拿同樣失敗的方法，再來中國試驗，難道爲張邦昌吳三桂的中國的特產品，中

國遠東病夫，還够不上土耳其近東病夫麼？總理在民族主義第一講，贊美蘇俄抑強扶弱，幫土耳其革命，但是土耳其反了蘇俄，爲什麼呢？總理不說，暗示我們留意罷了。

「現在我們的口號是糾正辛亥革命之不徹底，製造新國慶紀念節，打倒一切軍閥及資本家，剷除內部的奸賊，勞動罷工絕對自由，馬克斯主義萬歲，階級鬭爭萬歲，無產階級人們萬歲！」

本委員案：無產階級人們受他這幾句萬歲，正同普通開會，我們國民黨也還正在那裏受他「國民黨」萬歲的榮寵，這都是被他利用時的獎品。

據上面共產黨敬告同志之步驟，參合共產黨首領二十年之定期，二十年內中國國民黨滅亡，中國實行列寧式共產主義，或止是掛出招牌，似已爲難逃之巨禍。加以彼輩敬告同志，明言雙十節無價值，值得他們熱烈慶賀的，乃係蘇俄革命紀念日。又最近湖南省黨部，已有擬擁護鮑羅庭之口號。查有歐人李德爾致陳同志友仁書，曾言鮑羅庭從前化名犯罪，屢更其國籍。鮑羅庭之名，本非彼之真名。彼在蘇俄共產黨內爲煽動委員會之委員，故挑撥離

間之手段，惡劣萬狀。對人情厚貌深，乃是中俄共產黨普遍訓練而成之同一面孔。他們閑談交際是溫溫和和，說起關係話來是結結硬硬，做出來是惡惡辣辣，說謊話是載在他們聖經第一章。（此想當然，他們有無聖經，則吾不知。）鮑在廣州時，有廣東皇帝之號，我們鄙夷他，以爲不配，今觀其把持漢口中央黨部及國民政府情形，老成痛心者不敢異同，歸化希旨者甘爲傀儡，鮑羅庭已支配國民政府下之中國，曾無疑義。（共產黨用一個指頭遮羞，說中俄同在第三國際，不相統屬，更是變戲法的說話。其實那種帶領引見的情形，蒙古是慣做屬國的，我想蒙古容許也說本是屬於中國，何妨又屬蘇俄。中國是止被人一再盜國，却還不會做過屬國，這正好共產黨去新試驗，我們國民黨不願意。要進第三國際，我們將來自己用國民黨去進，不要用列寧式的共產黨做贊見去進。）於此而得兩結論，乃本委員所不能不舉發者，而本會所不能不通過者：

（一）共產黨決定剷除國民黨之步驟，有以黨團監督政治之言，則明明爲已受容納於國民黨之共產黨員同預逆謀。此本黨不願亡黨，在內部即應當制止者也。

(二)現在中國國民政府，已爲俄煽動員鮑羅庭個人支配而有餘，則將來中國果爲共產黨所盜竊，豈能逃蘇俄直接之支配，乃在變相帝國主義下爲變相之屬國，揆之總理遺囑，聯合世界上以平等待我之民族，大相刺謬。此又應當防止不平等而早揭破一切賣國之陰謀者也。

(有人說俄國已廢除不平等條約。然此止平等之一端，如德如奧，皆已廢除不平等條約，依照第一次全國代表大會宣言，止能認爲最惠國，聯合則平等未完全，顯生問題。所以德奧可認爲最惠國，尙未聯合也。)

因此本委員認爲情事非常重大。現在漢口中央執行委員會爲共產黨及附和共產黨之各員奉俄國共產黨煽動員鮑羅庭而盤踞，乘北伐軍堅攻肉薄之時而肆其咎兵抑將之議，最近諸方怪謬之改變，無非有意擾亂後防。蓋中國共產黨首領陳獨秀，本有反對北伐之文，俄國共產黨鮑羅庭在廣州亦建緩取江浙之議，卽因他們老實不客氣，勢力未充，不欲國民黨羽毛驟豐，便共產黨難下摧毀之手段。似此逆謀昭著，舉凡中央執行委員會內叛逆有

據之共產黨委員及附逆委員應予查辦未便尙聽其行使職權恣爲顛倒應再召集中央執行委員會全體會議，或產生全國代表大會處分。但變故非常，一時不及等待，故本委員會不能不集會摘發。是以本委員特將亡黨買國之逆謀，十萬急迫，提呈本會，伏祈予以公決，得咨交中央執行委員會非共產黨委員及未附逆委員臨時討論，可否出以非常之處置，護救非常之巨禍，則國民黨幸甚！中國幸甚！

六、實行驅共

中央監察委員會接委員吳稚暉之呈文後，連日召集緊急會議，議決咨請中央執行委員以非常緊急處置，防止共產黨之謀亂，乃咨文中央執行委員會曰：『竊本會職責所在，黨員施政方針，是否根據本黨政綱，一尙應過問，則棄裂本黨政綱，釀成亡黨賣國之行爲，尤應舉發。是以本會委員分赴各地，遇集上海，遂於民國十六年三月念八日先開臨時會，決定於四月二日下午七時，召集中央監察委員會全體緊急會議，到會三分之二，蔡元培、李宗仁、古應芬、黃紹維、張人傑、吳敬恆、李煜瀛、陳果夫共同出席，公推蔡元培爲主席，由吳敬恆提出共

產黨連結容納於國民黨之共產黨員同有謀叛證據一案，經出席委員共同討論，復由各委員報告最近在湖南、湖北、江西、安慶、上海共產黨之所爲，皆直不利於國民黨與受外人指使之事實，其騷亂社會擾動後防，尤其餘事。故全場一致議決，將訪察所得首要各人，咨請貴委員等以非常緊急處置，姑將所開各人及各地共產黨首要危險分子，經黨部舉發者，就近知照公安局或軍警暫時分別看管監視，免予活動，致釀成不及阻止之叛亂行爲，仍須和平待遇。一面由貴會公決，召集全體中央執行委員會共議處分。再所有漢口聯席會議及第二屆第三次全體中央執行委員會會議，皆受俄顧問鮑羅庭之指揮所顛倒，所有由該會議產生之機關，其所發命令，本會亦認爲發生疑問，並請貴委員等應按酌事實，分別接受與否。其准予接受施行者，以備下屆全體中央執行委員會討論追認，其有不得不否認者，應暫時擱置，因中間雜有便於叛徒之命令恐適釀大患也。本會此等建議，因防止非常大亂，恐亡黨賣國不及救止，爲萬不得已之所爲，是否有當，於第三次全國代表大會開會時補請公核，如有失察，甘受處分也。」

南京方面之中央執行委員會委員，於接到監察委員會之咨文後，即決定遵照監察委員會議決辦法，咨請國民政府知照軍警機關以非常緊急手段，實行驅共，於是兩廣、閩、浙、蘇、皖等省，遂有清黨運動之發生，而共產黨員之在以上諸省活動者，遂不得不銷聲匿跡矣。寧方國民黨員，并以武漢國民政府及中央黨部被共產黨把持，乃於四月十八日，在南京組織新國民政府，復將中央黨部遷至南京，不承認武漢之國民政府及中央黨部。

武漢方面之國民黨要人，初不同意於寧方之驅共政策。後於六月初旬，發見共產黨之秘密決議，此決議之內容共五項：一曰「關於土地革命，應從下級沒收土地，不用上級機關國民政府下令沒收土地」；二曰「在中央委員中增加新的領袖，將老的領袖代替了」；三曰「國民黨現在的構造，必須改變」；四曰「消滅現在不可靠的將領，武裝兩萬共產黨員，加上從兩湖挑選五萬工農分子，組織新軍隊」；五曰「以知名的國民黨黨員作領袖（不是共產黨員），組織革命法庭，處罰反動的官軍」。對於國民黨之生命，皆不曾加以根本的危害，故政治委員會亦議決實行驅共，而湘、鄂、贛諸省遂亦有清黨運動之發生。清黨以後，共

產黨之首要分子，或被捕殺，或被開除黨籍而命令通緝，政治顧問鮑羅庭與軍事顧問嘉倫，亦已解雇返俄，國民黨勢力範圍以內，似已不復容共產黨之活動矣。

共黨既去，障礙已除，今後國民黨黨員，當盡爲三民主義之忠實信徒，必能化除意見，團結一致，悉奉孫中山先生之遺教，努力奮鬥，於短時期內肅清軍閥，打倒帝國主義，完成國民革命之大業，建造真正獨立自由之中華民國。

新時代史地叢書
主編者 蔡元培 吳敬恆 王鈞

中國國民黨史

此書有著作權者必印必究

中華民國十七年六月初版

每冊定價大洋

外埠酌加運費匯費

撰述者

華林

校閱者

蔡元培

發行者

上海寶山路
商務印書館

發行所

上海及各埠
商務印書館

New Age Historical and Geographical Series
Editors in Chief

TSAI YUAN PEI, WU CHING HENG & Y. W. WONG
HISTORY OF THE NATIONAL PARTY
OF CHINA

By

UHA LIN I

Edited by

TSAI YUAN PEI

1st ed., June, 1928

THE COMMERCIAL PRESS, LTD., SHANGHAI

All Rights Reserved

\$0.50

革命民的衆的參考書

本書於中國革命經過孫文主義內容國民運動趨勢及黨治下各種團體組織等均經詳細敘述文筆淺顯眼光純正爲新時代之民衆及從事革命工作者不可不備之書

新時代民衆叢書

全書二十册 合購定價二元 零售每册六分

目 書

(一) 史略類

孫中山先生傳略……傅幹平

中國革命史略……莊適

中國國民黨史略……華林一

中國國恥史略……黃學先

(二) 學說類

孫中山先生學說的研究……朱經農

民族主義淺說……胡化魯

民權主義淺說……榕桐孫

民生主義淺說……胡去非

建國大綱研究……林式增

民權初步摘要……劉光華

實業計畫摘要……劉光華

行易知難學說摘要……余祥霖

土地問題淺說……張原聚

(三) 國民運動類

婦女運動……陳彬蘇

關稅自主問題……李培恩

法權恢復問題……唐鳴時

(四) 要覽類

中國國民黨要覽……熊夢非

不平等條約要覽……曹增美

職業團體組織法要覽……張梓生

黨化教育要覽……章超

新時代教育社出版

商務印書館經售

新時代教育社出版



民衆教育用書

商務印書館
經售

三民主義千字課

二册 每册定價七分

王琳編 蔡元培校 本書係南京曉莊學校民衆教育研究會根據三民主義編輯而成只用一千常用字主旨在使全國民衆對於三民主義易於了解人人能由思想生出信仰再由信仰生出力量俾三民主義成爲四萬萬人公有的救國主義全書兩册計分九十六課每日費一小時教授一課四個月可以修畢凡舉辦民衆教育或平民教育之機關均宜採作教本之用

民衆教育讀本

八册 (一)(二)各八分 (三)(四)各六分

新時代民衆叢書

二十册 一元零售每册六分

國民革命要覽

一册 定價五角

師 鄭編 本書要目有(一)國旗黨旗概說(二)總理的遺蹟(三)總理的主張(四)總理的建設方略(五)中國革命歷史(六)國民黨沿革(七)國民黨章程(八)國民黨代表大會宣言(九)不平等條約概況(十)各種慘案(十一)各種紀念節(十二)各種協會組織法(十三)工會條例(十四)各種革命歌詞及譜並附彩色銅版插圖四幅歌譜四則舉凡政治常識國民革命史實以及中國與列強之關係無不以通俗活潑之文筆詳述之誠今日民衆運動之良好導師

101578668



中華民國玖拾叁年捌月拾柒日購買



國家圖書館



002855215



29

籍